

零陵縣志卷八

人物

孝義 隱逸

忠義 方伎

儒林 仙釋

文苑 耆壽

仕蹟 列女

流寓 壽婦

邑山水雄奇甲於南服其磅礴蜿蜒之氣鬱積必洩在物則為丹砂鐘乳梗枏竹箭之材在人則瑰璋權奇蔚為倫表輝映古今光昭簡冊洵乎尚矣爰以孝義忠義文苑儒林仕蹟等類晰厥條流綜為銓次兼志流寓如賈誼適長沙馬遷浮沅湘窺九疑名流所經林谷增重不以借才為嫌也志列女者

國家旌揚節烈肇端風化閨闈檢操同於忠義故併入人物不復別為撰次云

孝義

漢

零陵縣志

卷八

人物

孝義

一

鄭產為白土鄉嗇夫時民間生子輒賦口錢貧民生子多不育產戒百姓勿殺子為代出口錢郡縣為請於上錢因得除改白土曰更生鄉

南齊

譚宏寶齊高帝建元三年大使巡行天下宏寶疏從四世同居其衣食事聞詔旌其間蠲租稅

宋

唐徹字子卓號愚菴績之族也家貧苦讀習戴記為邑人倡謁劉靜春授以近思錄學益進居官能廉丙午大疫有周姓者闔門僵臥鄰里莫敢過徹獨往為醫治之死則具棺以葬踰月乃反

蔣淦進賢鄉人善屬文少入太學不遇歸隱黃庭堅在宜



州病革漳往見焉委以身後事及卒爲棺斂具舟送歸鄒  
浩謫永州漳從之游浩有昭州之行漳又爲之經紀其家  
元

康必榮散財周急累世同居表其門閭

唐筆字仲端敏而好學淹博爲通儒篤於孝承順色笑無  
纖芥怠母終筆哀毀幾絕躬負土以葬因廬於墓每多孝  
感事人傳誦之

明

鄧連字廷器邑御史敬之子事繼母劉最孝劉性剛凡飲  
食皆連親進每晨盥水必漉以布去滓濁偶一日水未淨  
劉以木櫬觸其脅暈於地幾絕及蘇復進如故領宣德十  
年鄉舉會試中乙科授廣東惠州府教授父敬染目疾請

零陵縣志

卷八

人物

孝義

二

移本省以養陞韓王府左長史告歸祀惠州府學名宦

故老

相傳致政時母所觸處生毛人以爲孝感

曾孫鍾衡性仁厚尙禮義兩事繼母

曲盡孝養生平不履公庭課經訓子鄉里稱長者焉

陳蓋字用中邑廩生父元以貢生授教職母氏張隨父任  
重慶卒於學舍扶匱歸葬哀毀過禮幾不欲生父遷壽昌  
王傅卒於省城蓋奔喪泣血及歸葬廬墓三年學使者旌  
其孝行

陳典字堯道達之子忠潔純德之五世祖也成化十五年  
鄉舉才識開達慨然以忠孝自期以二親老不赴春官試  
竭力奉養親疾籲天祈以身代盡誠盡禮邑人效之

熊价字季藩居城北宏治甲子鄉舉歷官同知有善政以  
侍養告歸居官餘祿與兄弟共之知府某表其門爲熊氏



友愛後祀鄉賢

章貴原籍江蘇以武職調永州遂家焉居郡城集賢坊性  
恂謹善持家子孫繁盛耕者出居鄉而讀者隨居城門內  
雍雍里街取爲楷式相傳貴嘗行水晶巷拾金梳一旁觀  
詫羨之貴曰此必某僕以主命赴典者弗得必斃彼命俟  
其人至詢之果以主病待質錢供藥餌者也貴立還之其  
人感泣而去壽九十三卒後嗣多顯貴者成化中封武德  
將軍名甫者其曾孫也

新編

蔣仲春字中陽庠生爲人長身偉幹性誠慤方正澹於利  
欲有女歸唐之俊者其夫婦並疫亡遺一子二女子甫歲  
餘家巨富族人謀据焉仲春卽撫其子女於家而時稽其  
產卒嫁其二女而教其子游於庠每歲錢穀出入皆置籍  
零陵縣志

卷八

人物

孝義

三

仲春雖貧不絲毫自私也及其子長且娶妻乃舉而歸之  
而家業已倍往日卒年八十五

易大化號春泉祖綱賈鹽於祁途中拾遺金候亡者還之  
故有隱德大化幼承家訓益修厥行平生無疾言遽色人  
有詈者不聽輕財好施負者不責其償子三才萬厯丙子  
舉人三極萬厯辛卯舉人三極字泰字初授廣東番禺教  
諭陞廣西賓州知州平淡寡欲性尤慈惠及三年未嘗刑  
一人比歸惟圖書數卷而已時或饋粥不給亦怡然自適  
也

鄧崑字良玉號萬山性好施予嘗遇人道哭詢之則負緩  
未償者勢且垂斃崑卽探囊出白金二十兩並託呂日洲  
代請於縣令以脫之除日有人於城僻處要崑而泣以貧



崑攜至家以五金與之其妻孥固不與聞也崑歿有奔號於柩前者甚哀家人問其故乃向乞金者之子也生平隱德多類是子自芳字芬如性友愛好善有父風遇危迫者時解推之

蔡橋字子渡性正直里有爭訟得一言而解聞人冤抑不覺流涕必出金拯全之不合人知

魯光緒字蔡衷庠生爲人醅謹事親能以孝養屢試不遇日以詩賦爲樂著淡甯軒集

王元達天性篤善輕財尙義遇人競訟力爲解釋貧乏者調濟之知府丁某榮以冠帶縣令傳某獎以德行迄今人猶慕之

蔣如蘭字馨之以愿慤爲鄉里所推任倉大使種陰德不零陵縣志

卷八

人物

孝義

四

倦晚生三子皆入庠

張友周字以文祿仲子庠生事親備極色養篤友愛季弟嘗與伯兄爭財致訟友周則捐己田數十畝以解之鄉人有負金者約數百悉焚其券又置義塚收瘞漏齒及貧人之無地以葬者嚴於訓而恕以接人菲於自奉而腆於宴賓無事不以古人自期壽八十有二卒子內涵心涵心涵字常宿號鑑湖與兄內涵少以文名振於時試輒冠其偶平居色溫氣和人無賢愚咸敬愛之至見人不善則直言不少諱父性嚴終順承之無幾微忤事兄如父由明經司訓澧州明時教職得與民政一日州獲大盜八將定辟心涵察其貌不惡訊之乃乞丐誣爲盜者白州長釋之時流寇戒嚴一日獲縫人以爲謀也將殺之心涵廉其情得



免有田生之玉僕爲金生所奪訟於官凡數易咸貪金生賄左袒之心涵至立斷歸田虞生者有產八百畝其僕私獻於荊州惠王王遣官至澧勘之虞不知也心涵告生且使鳴於防憲王永祚立斃其僕而保其產金姓據陳姓陰宅爲僞墓於其地訟十餘年不決金以賄行也至是控於台省符下州守命心涵勘將以鐵槍探其穴金懼供實乃以地還陳而正界焉轉桂陽學正致仕歸年八十五卒子守銘字伯敬生而純孝事二親無違顏日嘗左右侍誠敬肅穆不衣冠不見也出入必告不告不敢離也好讀書嘗至丙夜爲文爾雅醕正見賞於督學徐爾猶游庠食餼私室不蓄一錢而性慷慨能周人急以明經司訓道州與諸生談竟日不倦束修之奉未嘗出諸口後以壽終次子宗

零陵縣志

卷八

人物

孝義

五

銘字仲敬號西岩歲貢生博學工詞章試輒高等事心涵最孝性剛直與人合洽而議論終不少屈父司訓澧州積有薄俸命宗銘買綿津市身儉窺其年少計以色餌密令其妻挑之宗銘卽移宿舟中其見色不苟如此鄉有買豕者遺金於其家宗銘不啟封俟其人至出還之仗大義遇不平事力爲剖決好讀書至老不倦甘澹泊不事生產惟購求書籍如恐不及也子孫皆以儒世其家

胡維翰字宗卿居仁里人宋胡寅裔性純孝色養甚篤長吏屢獎其行兩中副榜萬曆七年選貢廷試第三以母歸養母疾躬侍湯藥親滌溷穢如是者十五年竟不仕叔弟早死遺二孤撫誨無異己子

柳應權字貞甫子厚第宗一之後也髫年補弟子員事繼



母至孝內外無聞言繼母生弟繼權友愛極篤共炊者數十年叔煖死其子先卒遺幼孫應權撫之成立學官儀其孝友舉優行焉生四子學惲學悌庠生

唐汝賢六世同居成化中旌爲義門

秦肇雷字君顯庠生少刻意讀書文譽彪發然謙退不以自矜避亂鄉居事母孝教子甚勤暇時以詩酒自娛灑灑高致閭里皆嘉尙之年七十九卒子一彥庠生

吳宗伋字秋潭歲貢生性至孝母染異疾極力調治顛天泣禱疾遂愈母歿朝夕悲號不已淚盡繼之以血因喪左目鄉邦稱孝子焉子杰孫雲鵬萬曆天啟時拔貢

蔣汝蘭性慷慨少有逸志邑廩生縣學宮舊在瀟湘門內水法未善堪輿言當遷汝蘭卽驚已產赴京上疏疏允適

零陵縣志

卷八

人物

孝義

六

巡撫姜某巡永相度城東吉地因遷焉自後科名絡繹人以爲好善嚮學之報

魯鎧

王志作賦

東隅里人連之祖也性仁厚幼失怙事母至孝

母病號泣籲天請以身代及卒廬墓三年

高綱字子尙制行端謹以事繼母疾棄舉子業終身孺慕不衰年八十七以長子鈿貴得封贈兄繡字文所亦孝弟

君子也以貢生除九谿訓導遷普甯教諭陞黃州教授明正學以勗多士一時嚮之鈿號鼎垣萬曆乙卯舉人知華

州懲猾祛蠹愛民如子暮年大治總制楊修齡首薦之欲擢以不次鈿以父年耄流涕乞歸養歸一年而父卒遂以

哀毀殉焉祀華州名宦弟鋟字榮垣幼醅謹嫡母陳九十有三鋟嘗侍疾衣不解帶及陳卒哀慟如所生見者感泣



兄弟六友愛甚篤父歿分產鋟流涕不忍言地肥饒勿問也世亂隱居不與外事惟諄諄以孝弟爲訓嘗曰人不孝弟讀書何益哉子治廩生丙子副榜澧貢生任湖北通山教諭並有名稱鈿子汲字二水邑庠生天質警敏幼隨父牧華州案牘山積汲佐父立剖晰之情事悉當然性醇謹平居未嘗以才畧自見也習舉業爲萬吉人吳茲受所賞識累鄉試不第值貢期竟以遙授領冠帶蓋異數也家居教子皆成名枝林庠生林太學生

歐湖字龍田家中人產有告匱者輒予之償否弗計也憫狴獄囚赭衣縷縷無食者食之凍者授以絮歲以爲常晚年生子卽副使繼修也繼修字二如有宿慧日記千言爲文敏捷天啟末舉於鄉恤貧排難忠信孚於閭鄙授融縣

零陵縣志

卷八

人物

孝義

七

令教民禮讓不鞭朴而相率從善兵事急擢監軍道尋謝歸卜築隱居不問時事父子皆以高年終詹懋舉字泰宇以萬厯選貢任鳳陽府判有廉聲以母年八十乞養歸時懋舉年亦近七十矣依依孺慕溫清必躬親之母壽九十八歲無疾而卒人以爲孝感云

彭洛字宗程歲貢生任衡陽訓導遷通道教諭母年高嘗效老萊以博其歡鄉邦稱之弟洵字宗蘇號少泉亦以歲貢司訓黃安遷湘鄉教諭陞長沙府教授忠直孝友有古人風洵子士彥字美之亦有孝行處事必嚴謹不妄交交必以信喪妻不再娶或勸之曰予豈矯情然者每誦曾子孝衰妻子之言輒悲惋不勝敢忘其訓哉獨處者益五十年子文燭文煥庠生



蔣復春字見字如桂之子生而穎異有大志讀書至忘寒暑性仁恕謙恭喜獎掖後進以歲貢歷學官者四以身率士貧者解俸濟之初訓永福有劉拯者家貧父早喪事母至孝母悍且嚚拯婦事之稍不順輒撻之流血以小故命拯出之歸外氏凡三年復春聞之詣拯宅諭以恩義其母弗順也悍益甚復春廉得其意陰出俸爲母市簪珥服飾假爲婦禮乃納焉婦歸事母亦謹母亦悔悟不如初也張崇新喪兄未閱月嫂父欲嫁其女新不可遽誣以盜嫂聞之督學復春爲力白其寃後二生俱以甲子舉於鄉並德復春至其家拜謝焉先是直指以特薦聞而公已告歸矣著有青氈集浮雲集易經四聖問心稿孫又滋字潤一庠生少負大志性聰穎讀書目數行下然恂恂雅飭不矜才



彌高名凡三擲不起吳逆平謁選得鎮平縣勞心撫字民咸戴德蒞任五載獄無命讞 欽差按臨聞有蔣青天之頌以其實上達陞授主政任刑官於死者多所平反官僚冤抑者凡五皆全活之山西巡撫某有隱曲不能自白亦代達無所避三年致仕歸又十餘年卒又滋心政新知等作及彌高詩文多傳於世

胡湘誠孝篤至父病危籲天求以身代遂愈父母相繼歿哀毀踰禮廬墓六年旦夕負土加封風雨不避有司表其門

呂仲枏字又元郡庠生學簡孫八歲喪父以孝聞謹厚謙退人不見其喜怒鄉里稱長者有盜其池魚者鄰人以告枏曰予豈不知此但不敢以細物致鄉里有盜名耳事兩零陵縣志

卷八

人物

孝義

九

姊尤愛敬生養死葬備盡其禮又爲貧人娶且葬者五贖無依孤子者二然終諱之不告人也屢試不第而卒有六子皆業儒

王懋功庠生性孝友制行謙恭生平未嘗一字干謁公庭人皆稱仁厚長者屢推鄉飲賓不就

張翕字成吾六歲失恃善事後母幼有聲庠序周元汀時已顯貴見之謂爲不及也長子大生崇禎時由貢生任湖北應山諭季臬生字抒一又名大武生而剛方言笑不苟事親最孝母氏貢年八十九有瘋疾歷十餘載舉生與同寢事之未嘗少離母歿葬祭盡禮與昆弟處雍雍然教養諸姪如己子遇父母生忌日嗚咽不食同邑桑日昇尤心服之嘗曰抒一孝友性成未可學也偶於市拾銀闕不啟



封識以待失者還之崇正末邑大荒斗米十千舉生乃貶食以餽餓者全活甚眾生平嘗喜孟子三自反章終身體行之家故永衛世封例得襲職然不以爲榮也子又乾郡庠生孫三長邑廩生舉生嘗戒之曰爾曹生質炯然此身如玉玷卽不可磨矣子孫謹守其訓年八十七卒里中私謚端毅先生

陳禹咨字湘洲性忠直不苟幼失怙叔待之少恩積誠感之叔悔悟更善待之事兩母以孝聞少游廣西拾遺金還之粵人至今傳其事以子純德貴得封布衣蔬食未嘗稍改其素北都陷純德殉節家書至揮淚發之哭失聲已而嘆曰有子如此吾復何憾永州亂其子孫奉之避於鄉年八十卒弟周咨字瀛洲事父甚謹母氏馮失明屢禱於天零陵縣志

卷八

人物

孝義

十

而愈析產伯仲欲取贏卽以己分讓之皆慚悟年八十六卒子純愿孫才修俱庠生樊佩字養和庠生性孝友兄瑜艱於嗣且貧匱佩事之曲盡其禮爲餘干主簿民有兄弟訟者以己事兄者諭之民感而化

章焯字養順庠生刻志問學姘行狷謹事母以孝聞桑愈高字道升庠生家貧甚然值父喪凡斂葬皆獨任之不以責諸弟居鄉敬讓人有忿爭涕泣諭解之息事乃已見受誣枉者力爲援救無所遯天啟甲子歲大饑田穀熟有竊掠者愈高知其人不之詰後其人以他事訟瘕死乃歎曰吾縱若而適以斃之悔何及邪鄉試歸城步縣饒某與同舟患疫爲手診之躬良藥以進饒得愈晚年言及父



母猶泣下每食輒思之生平兢兢守身未嘗二色卒年七十九學者私謚端孝先生子日昇字木生性穎而介讀書通暢品行修潔弱冠爲庠生工舉子業然獨尙古文詞不爲時流華靡之習敦崇仁義以古人爲切劘雅與忠潔純德善又見偉於萬吉人壬午舉於鄉制行如常不以私干當道世亂鄉居解釋周子太極通書又注疏易經皆有確見年七十二卒子八人六列庠餘業儒

陳三績字玉凡號參山幼開敏十五游庠試輒高等鄉試者十一竟不遇以歲例得貢又棄去事母李最孝或頃刻離必婉慰數四而後出舊與陳忠潔純德爲莫逆交以天下爲己任獻賊陷永聞其名欲招致之乃遁匿不出克復後當事薦其高節題授桂林通判不赴隱雲莊山二十餘

零陵縣志

卷八

人物

孝義

十一

年遇佳山水常携朋流連竟日性善飲一斗不醉不事生產惟以詩文自娛佳節良辰卽來往交游家天性和易遇庸豎俗兒皆得畱畱或數日時倦出則閉戶擁書左酒卮右丹鉛若與古人相晤對者所著易經傳義衷康熙二十二年 詔求遺書當事取以應之別有教養篇樂志論參山詩集四十九卷卒年七十二子醅字素公幼事祖母內外稱順孫嘗捐貲爲族弟婚娶順治五年選拔

唐瑄字官玉庠生知府金維基器之貧而好學菽水事親孝敬不違居喪每食必立侍如親在時益三年如一日也時稱純孝焉

陳廉字汝周號月巖年十六食餼幼以孝聞父鞠疾劇禱於神矢以身代及喪擗踊痛悼至不欲生學使者屢旌之



卒祀孝子祠其從兄洛字汝京四歲知孝繼母生平無口過以壽終

伍就湯字鍾秀庠生事親能竭力父學曾長者也年老病消渴好飲泉水其泉原去家數百武就湯嘗躬汲之寒暑不倦如是者二十年一日宅旁石罅水忽涌出味甘冽父飲便之人咸以爲孝感學使者採風加褒禮焉

呂國臣庠生事親孝居父喪寢食必於靈前足不出戶者三年免佃民租若干爲父資冥福邑合某以孝義高標額其門子元韶元護俱庠生

國朝

傅明賢字君錫號起巖東隅里人祖亨明舉孝友特科官御史順治五年明永明王圖恢復遣兵圍永州明賢時奉

零陵縣志

卷八

人物

孝義

三

母趙氏就醫城中亟負母出爲門者所禁逾月明賢縋城出省父明日復白其父入城奉母舉家哭畱之曰父有弟我可暫離若母無我生死何倚哉其子乃泣送之中途作絕命詞七章遂入城城中糧絕兵食人其母聞之恐怖死明賢遂一慟殉之

蔣應鬢東隅里人巫師蔣師皋養子居唐公廟明永明王軍圍城三月城中糧匱兵日食居民一日兵眾入廟繫其父將殺而食之時應鬢方童也自神後出跪曰父老且瘠請以身代兵釋其父牽之去竟殺之父得存解圍後父出每向人泣道之康熙四十三年學使潘宗洛表其孝爲文祭之邑人立像祠之唐公廟中嘉慶二十二年知縣宗霈上其事明年知縣曾鈺申請得旨予旌入孝子祠



周良富字清泉姓好善國初時鄉市饑施粥四十餘日出  
千金修茅江橋夫婦皆七十八而終孫三人皆餼於庠其  
六代孫之綱監生侍母疾能竭勞修亭渡橋梁多義舉八  
十八無疾逝子孫多矜佩士焉

黃鳳梧字鍾瑞庠生善承親志姊家中落資其衣食三十  
餘年及卒且經其後事既又爲其三子畢姻康熙戊午歲  
凶出所積給宗黨朋友其償否不復問也同學王生貧不  
能娶出金助之待人和易有爭端見之輒解子佳色舉順  
治十七年鄉試第一

雷開天字贊化庠生明季兵興民苦科斂同里推開天爲  
社長極力曲全眾感愛之康熙己未吳三桂之變道殢相  
望開天悉爲收瘞爲善於鄉不求仕進卒年八十四以子

零陵縣志

卷八

人物

孝義

三

春晉貴贈鄱縣訓導族子春首字梅叔方幼父以誣被逮  
春首挺身白其事當事奇之得解尋游庠事親色養不衰  
推愛庶母及諸弟無間言人以爲難卒年亦八十四

蔣讓字述言康熙三十五年副榜任辰溪新甯教諭歸時  
家貧如故父歿讓年六十餘矣哭之喪一目兄弟終身不  
析爨

李之英字伯和康熙四十七年恩貢選桂陽州學正未就  
少孤竭力事母教子弟有家訓十二條皆至言也卒年七  
十七

蔣漣字秉相父本祁陽鄧氏爲蔣後遂爲零陵人性篤孝  
出入起居惟父母是依雖老不異繼室某稍不順於母卽  
出之父母歿廬墓六年墓側列樹成行有鳥五色巢焉鄉



人繪圖紀之子四鳳色鄉榜大鷗拔貢大鳴歲貢

湯錫哲歲貢生幼有志行父之輅性嚴急老艱於行錫哲嘗撰杖以從能適其意母虞年六十患癱凡更二十餘年錫哲日左右扶掖飲食湯藥不假婢僕手兄錫明早世撫其子若己子庶弟錫遴錫桓析產後家日匱乏復出己田產給之且多方訓誨俾以學行自立故人子有貧無依及不能婚者多所周恤子四並歲貢生孫舉人弟錫遴郡庠生雍正六年與睦文煥同舉孝友端方發江蘇用知縣署荆溪縣張渚司巡檢終於任童時父及嫡母相繼歿錫遴哀毀如成人母疾目幾盲錫遴虔禱請損己壽以益母疾果愈目亦復明任張渚時遇火災爲禱於神忽大風火頓息歲旱又禱而得雨市中見丐者貌兇悍拘鞠之云葉姓零陵縣志

卷八

人物

孝義

齒

偕者凡五人檢其行李得鐵鑿上有泥疑爲盜者遂解五人並鑿於縣縣無情實將釋之適稽盜有指葉同贓者搜其身果有當票二十六於是眾頌其神喪歸士民哭送者數里著有石巖詩存一卷石巖制藝一卷石巖卮言八卷高棫恩貢生七歲而孤侍母唐氏晨昏不忍離吳三桂陷郡時奉母避山谷遇大雨母飢不能支棫負以行道逢山果熟取以啖之母疾幾不起棫每夜焚香祈滅己算以益母病遂痊幼嗜學熟先儒語類於史鑑多所評論七子皆有聲於庠

謝元鼎字君贊家貧嗜學髫年補弟子員食餼精舉子業一時俊秀多師事之居鄉謙厚輕財好施隆慶里有李信吾者以負營債父子久繫於獄欲嫁其媳以償已書婚券



矣時媳撫其子哀號不絕元鼎聞之卽向參將劉某白其事而捐銀以償之李父子並釋而其媳竟獲全元鼎負大志然屢不第康熙七年例貢士知縣李如洪爲請於督學許遙授之督學復旌以額曰太邱遺範年七十有八卒子三承統廩生承緯庠生承紱王子亞魁

蕭本生字湘生又字字臣初家秣城後徙居側塘康熙癸卯舉人四歲孤事兩母孝撫兩兄遺孤恩最厚順治丁亥大饑斗粟萬錢分食以濟飢民母復出簪珥佐之多所全活戊子粵兵圍永城人相食百計俾家無恙兵荒之後人各保身家見外來色狀稍異者輒疑爲賊殺之有江南道士同客民九人來避難眾執之本生推牛犒眾力保無他乃得釋里人李某得寶刀性尤嗜殺本生謂其爲銀刀也

零陵縣志

卷八

人物

孝義

五

李利焉寸斷燬之實鐵曰公給我厚我也遂改行有嫁妻以償官錢者罄囊中所有與之夫婦得全死而無棺者解衣以畀之生母范卒旬日鬚髮盡白廬墓三年有白雁千百爲羣集其側一日夜始去又有虎繞廬而嗥若與哭聲相答以哀毀甚免喪未一年卒著有讀書堂說禮及讀性理書于四岷邑貢生嚙甲子經魁崢嶸皆道州庠生

王陞榜字次錄冷水市人康熙癸酉拔貢父聘臣饒於貲而課子甚嚴陞榜幼耽墳典工詞章試輒冠軍事親至孝頃刻不忍離以拔貢需次曹郎因念父母辭歸不復赴選居喪哀毀不飲酒不入內廬墓四年其教人先躬修後文藝內行純至鄉人至今矜式焉子四嗣元庠生位國綱俱太學生



王鐸字醒人號木菴進賢鄉人歲貢生本姓楊祖士標入繼王遂冒今姓幼警敏力學試輒冠其羣趙巡撫申喬觀風拔置第一後以公事至永廉其行誼更厚賚之知縣朱爾介往過鐸則避去爾介歎曰名可得聞人不可得見也同知陳某調陞河間知府以禮請偕之去堅辭之貧而好施族有貧而死者具棺殮葬之里有鬻子者代贖之或爲不義眾執之將鳴於縣亦止而諭教之不義者卒改行外祖老且貧迎養終其身治家嚴而有法門內外不聞笑語聲所著有四書講義大易捷觀木菴家訓詩賦雜文子恩齊雍正癸卯舉人任桂陽州學正

王暉字東陽康熙間與弟暉同入邑庠性剛方而事父母極婉順人故以孝稱友愛諸弟懃懃訓誨皆有成就同居

零陵縣志

卷八

人物

孝義

夫

數十年無幾微間投徒得佳文輒請父良材至館爲獎勵之父益大歡其取予不妄市人皆知之弟暉字正曉號靜菴優增生事親有至性父母偶不悅必左右承順俟色和乃已兄暉嚴正事之如父幼弟從受學同臥起冬夜則以手枕之所學甚邃有靜菴稿教人不倦及門貧者束修悉不受間猶飲其膏火鄰里困乏考量力周之生平正直爲族里信服人有非禮事輒相戒毋爲暉所知年七十六卒子在綬性仁孝事親有孝行尤好施予嘉慶十二年大饑發粟賑濟存活無算邑考棚道路橋梁諸舉多所倡成有爭攘聞其將至卽解散惟恐其知也嘗曰與人畏我何若愛我其居心行事如此卒年八十五子金臺字兆燕附貢生事親孝胞弟四友愛甚篤接人素謙抑至營解紛難則



持正不徇昵雖悍驚者亦屈服之輕財好施每歲終錄里中貧者計口賦食內外宗親尤多賴其賜卹收瘞露齒歲以爲常年八十一無疾卒金崇字雨村少聰穎能文屢不售因援例就州同職性誠篤事親能色養其長兄年老二兄仕粵西獨操家政數十年不私一錢帛內外雍睦無間言遇里中游蕩不操正業者輒周切規戒之及悟而後已族子弟或善文藝必多方獎掖比於所生自奉甚儉穀而粥卹飢寒疾苦則不少吝里中稱善人

楊自箴字超林存樸里人年二十三妻黃病歿時長子卓四歲次存性二歲自箴躬撫育備極勤悴父母及外家勸再娶並婉詞寢其事居恆避嫌疑不輕外出康熙癸未歲歉計所存穀除家口食外悉分給里中寒人多所全活凡零陵縣志

卷八

人物

孝義

七

鰥居三十八年年六十一卒雍正九年請旌

伍大訓孝悌鄉人性忠懇好施予善持家政子四孫曾以數十計合炊者百口門以內雍雍如也鄉黨以張公目之季子興耀能繼其志知縣孔某以樂善必昌旌其門孫元昇伉儷有祖風嘉慶間大旱斗米千錢時家祇一日糧適族有不舉火者卽慨然分給之姪某以私積錢買田二十畝偶失其券昇拾之卽呼以予不問錢所自來也卒年七十餘元孫一珩字永敬生有至性幼隨父賈廣西省城每冬夏必歸零省其母歲以爲常父歿世其業久之貲漸裕有弟某拙於治生一珩凡兩分其產竟兩罄之意夷然不憾也方賈廣西時有周某者從肆某物甫成約而物值倍貴周所他肆者皆中悔而一珩獨予如約一日購某屋已



給值五百金矣有唐姓者強爭之眾議於五百數外更予一珩五十金蓋市規有此所以罰貪而獎讓也一珩弗受卒以屋推唐越日而屋火人謂一珩誠厚故免此零故與粵鄰游士往來無虛日至則如歸行則有贖廣西民風故狡悍道光來尤甚一珩既久習之一日語人曰此不可終處也比歸三年而金田亂作人以是尤服其識量云少以賈未竟學然聰慧善悟晚於諸書多所瀏覽時以己意釋其文義無稍謬論者

陳懷德興仁里人庠生陳禹道遺腹子也有四兄懷德行五母氏蔣三十一歲而寡母病時懷德方五歲憂慮不寢食聞吟呻聲輒跪搶地破額出血不止母躬績紡懷德暑則揮扇寒則進火奉茶亦嘗以時童輩呼之戲不離也家零陵縣志

卷八

人物

孝義

六

故貧遭吳三桂亂後貧愈甚四兄並喪更無倚爲生懷德乃鬻薪以度日身與妻子無完衣日不再食而供母必甘美母憐其困止之不從母乃屏弗御懷德則怒其妻意必有告困於母者復供之如前懷德嘗從母詢父狀母爲口畫手圖之聞之卽神色慘傷淚如雨泣暇則展父遺書哭誦不已母憐其心之過傷也乃斂而焚之母年七十三忽患心疾月二三發發則痛不可忍懷德日夜禱請減己壽以愈母病如是者歲餘一夜夢紫衣者曰吾爲醫之次日母果愈後不復發雍正癸卯母年一百一歲通判許某權邑事給貞壽蘭芳額旌之時懷德亦七十矣是年母卒懷德號慟幾死而甦旣葬廬墓三年朝夕薦食如生乾隆三年以孝行旌時年八十六猶健也



唐國典字帝有號欽齋高溪司人歲貢生任城步縣訓導年十八九始就學刻苦自勵工時藝卒成名儒父三才性嚴厲能曲承其歡父患痔躬洗滌膿穢扶掖上下床衣不解帶者凡百九十晝夜雍正六年 詔舉孝友端方當事推國典以母老弟幼固辭九年夏穀騰貴施白金以賙貧者十七年大饑賑以粥不足則借常平倉穀濟之先是國典曾祖一登於順治間曾施粥四十日樂善利人蓋有繇目云領教職儲育人材寒峻則資助之歸時門生餞送百里不絕知府鄭某贈有詩曰帝錫清閑歸畎畝天畱餘力課兒孫蓋紀實也卒年八十二著有讀書林文集雜組二編藏於家子命育尊賢庠生孫學藻學古學方貢生選學官

零陵縣志

卷八

人物

孝義

九

趙九成性坦直幼孤勤力養祖母母教諸弟並爲之娶處鄉黨以仁孝稱好濟世常製小兒藥丸以施妻孫氏能佐其孝並年七十八卒子承泰孫含馥俱邑庠

羅成綱母蚤歿善事繼母兄弟四人相友愛視從子如所生鄉有義舉力任之簸箕塘路及亭皆所修也年七十卒子大相能繼其志

周祚世字克榮祖均以厚德聞初貧乏竭力孝養兄弟三人友愛至老不衰遇事敢言鄉鄰爭鬪藉以衰息族兄文先遭誣置於理祚世出已財營脫里中善舉時以身倡年七十六卒諸兄祚備字家相幼好學困小試遂棄去然至老不輟吟誦爲人簡重不苟取與晚年修宗祠朔望與族子弟講明禮義年九十二卒祚俊字克三性耿介授徒不



計修脯終年不外出不荒訓課及門多成就者六十喪母水漿不入口者數日遂不復外館躬汲爨以事父年七十三卒

胡憲德監生幼貧力學有至性年十四父仕祜病革憲德驚痛幾絕父遺言立身向善爲要憲德泣誌之尋遠服賈力操作起家事母王曲致歡心課弟懋德俾專力於學得入庠一日將外出母殺雞具食弟偶爲骨鯁哇之有血憲德行數日仍返視弟固無恙曰心憶吾弟覺不安耳好周人急貸者不能償卽還其券卒年六十四

王者儒年三十喪偶終身不復娶兄弟六人同炊無間言年七十八卒

王際昌早失怙恃與兄者臚相友愛者臚病篤際昌禱以零陵縣志

卷八

人物

孝義

二十

身代遂愈俱年七十餘

唐賡盛字敬叔律身嚴謹篤志勤學爲諸生五十餘年僉稱曰有守之士

周之濂字月巖優廩生進賢鄉人明尚書希聖五世孫幼以禮法自持嘗失愛於繼母積誠感之乃愛如己出訓徒條約甚嚴出其門者從無踰檢蕩閑之事束脯半以資貧者所作詩文人多傳誦之從弟之統邑庠生家貧率胞弟讀且耕以養父母卒自成立乾隆庚辰歲旱荒有二人因飢乏欲嫁其婦統惻然語妻曰我家七人彼二人者家九人請減日食之半分我以活彼當無不可者其夫婦卒以全活故人歿不能殮卽槨之年七十病且歿其母年九十撫之慟哭旣絕復甦蓋其心未忍死冥冥焉方祈假年以



終母養神佑之故甦也越二年母卒統乃卒有枕石堂詩  
曾孫澄世字紫瀾父早故事母盡孝胞弟惠世出繼伯父  
友愛如一生平無疾言遠色雖童稚未嘗稍輕惟以修己  
明經勗後進口講指畫終日不勸門下多厲名敦品之士  
堂姪紹奭庠生紹林拔貢生紹邠歲貢生姪孫崇儁廩生  
崇傳翰林院編修皆其所造就者

蕭玉友字怡堂黃陽市人天性肫摯事親左右就養務得  
其歡父芝萃晚患風痺坐卧起居非玉友親爲扶掖不適  
有時痰昏病狂謂所居非己室玉友則更負置之又以其  
室爲陋則又折花插於座張綵幃於門壁以悅之間或遺  
矢未及浣則以手拭褥去之如是者凡二十年人皆以爲  
難父歿母復患目疾玉友嘗求醫於數百里外如是凡十  
零陵縣志

卷八

人物

孝義

三

年日復明兄弟怡怡從無爭忿乾隆乙酉黃陽市火鄰舍  
俱燼玉友家無恙知縣莊熊芝履災及之爲之動容稱歎  
旣歿以孝友 旌子三東來乾隆癸酉舉人秦來太學生  
惠來歲貢生

湯相傳字爰立號霖齋進賢鄉人乾隆丁卯舉人丙戌大  
挑知縣分發河南署唐縣補鄆縣訓導未兩月丁母艱服  
闋補綏甯教諭在任六年謝病歸歸又二十年而卒初相  
傳以母故改教及赴鄆縣而母已卒故終身傷悼之居心  
寬厚強悍者服其化尤善啟誘成就者幾二百人在綏甯  
建考棚培學校其郡縣兩文廟皆力襄成之爲文甚富尤  
善集古詩壽九十卒弟相弼字代言號寅軒乾隆癸酉拔  
貢官桑植訓導父治渥勲於教子待師盡誠禮每除夕卽



將明年國課及師修金封識之供祖宗位前雖他有益需不發也及期乃併納之兄弟皆有孝行父病痔老益劇常呼粥揉洗之乃稱快或戒云其疾恐傳染當代以僕婢粥曰僕婢獨非人乎使得分父之疾減父之痛何幸如之每揉洗時兄傳等爭爲其勞粥曰此吾所熟父所便也後粥竟病痔以其授經粵西新安風木山也因其義爲風木吟百首讀者泣下粥少受業於兄相傳友愛極篤粥感其恩義終身師事之在桑植時多所造就致仕日門人送者至數十里外不忍別子五入泮者三

高鵬程本名魁陽東山庠生煩子也弱冠亦游庠因煩嘗收租於祁陽王某家某匿其田畝煩論推之情急斃其幼子而以煩殺人訟時鵬程聘唐氏女尙未婚泣請身當之

零陵縣志

卷八

人物

孝義

三

襦衿繫獄備受撈掠誣服論死解行臺省按察司方讞先一夜夢神語曰書生胡不明理者往收租時用傘遮日耳擁大蓋何爲言訖而寤鵬程曰吾生矣神教我矣蓋某子傷痕闊三寸與所誣以傘柄擊死者大不實翌日鵬程具以供得昭雪歸知縣徐錫仁嘉其孝令改名應試遂復入縣學誦古親迎鄉里榮之翕然稱孝子友愛尤篤晚惟季弟翥存衰憊特甚鵬程於出入則扶之食則祝之數年不倦翥歲貢生初聘妻某目瞽其父請析婚翥不許竟娶之人以爲義鵬程卒年九十五子一孫七念祖懋祖愆祖俱庠生愛祖副榜曾孫十七列膠庠者九

王誠可原名參乾以字行號廣齋歲貢生蕩底人父槐榮母氏唐事之孝謹旣歿凡薦新及生忌日皆哭號不絕聲



至老不易與三弟同居推懷委誠從不私一財遇宗親所言皆慈孝事與交者醞醞然自化也博綜羣書訓課生徒終日娓娓不倦遇聰俊者獎拔之而資助單寒者性慷慨優幹濟然從不干涉外事年六十八卒

譚如綸太學生興仁里人少孤母張氏撫之成立性好施濟就貸穀者凡量斗出必贏入則概平之或甚貧不責其息不償焚其券曰吾不以累若子孫且恐我子孫執以自累也居家戒爭訟曰省一日忿怒卽高一曰清福故與人從無乖忤者讀書正襟危坐未嘗有惰容待師友竭誠禮始終不衰知縣陳三恪建羣玉書院徵如綸首其事凡以公相見外未嘗有所干求子二孫光鼎嘉慶辛酉拔貢庚午舉人宗親儀其行議請旌如綸婉謝之

零陵縣志

卷八

人物

孝義

三

尹培元母氏詹病足躬負之出入凡六年始愈嘗賣木棉於楚江墟販者值以銀誤增三十兩比歸乃知之曰彼數人合販者也如是不特失利恐同類致疑且相角因急走還之年七十三

呂仕經咸和里社長也父蚤歿母氏蔣老患骨風仕經每溫其衾與弟仕綸仕繡相好無尤同居皆逾大耋仕經掌社穀公出納爲諸社所不及一生善讓人未嘗構訟遇修葺橋路皆樂與焉子四季學東庠生

龍雲燼漢太守述裔也事父母孝治家嚴整人有忿爭力諭解之常勸人爲善卒年七十子孫多列庠序

陳英字倍千父一文蚤逝母氏雷英事之孝謹以母多病究心於醫學母偶不悅心卽皇然如有失必母色怡而後



安乾隆戊戌歲入庠性狷介不苟交游鄉黨皆敬之年六十八卒子三季可大庠生

唐正鴻善事祖母繼母刊勸善書以醫濟人年七十卒徐方伯東湘橋人幼讀書歷試未售性孝友事親能色養課子方嚴待人寬恕前學使以散謹延祺榜其廬卒年七十六次子邦彥邑庠

黃陞節孝王氏之孫也父自俊常賈於衡州主市值以銀誤增百兩及歸至中途知之乃返舟還其市陞幼承父訓遇橫逆忍不校歲荒多所賙恤或貸不取償與弟獻怡怡至老不衰卒年七十三後嗣多列庠

高佐字廷弼邑庠生木瓜埠人年二十五妻氏唐亡子女俱幼躬親撫養宗戚屢勸續娶弗聽母歿父年老嘗襆被零陵縣志

卷八

人物

孝義

二

隨寢既又請娶後母卒年七十餘

湯炳萼字馨園父相業以貧不自給適蜀授徒凡數年炳萼時年二十餘乃走三千里迎歸之父疾事之得其歡心父歿喪葬盡禮年七十六子孫多在庠

高烜字右亮陽東山人父林性方嚴諸子少不如意輒怒不解獨烜無幾微忤幼勤勵於學夜讀書常三更不寐父憐之愛加諸子乾隆丙寅貢成均然淡於仕進所居秋香山房遠近學者多師之得修俸不以置產惟廣購書籍餘以給貧士有衣食於烜至八九年既成名而後去者或勸烜爲子孫計謝曰任後來者自爲之吾何與也其孫曾皆名諸生

劉瑛字璞堂性樸直早失怙事祖父母母盡孝祖父母高



大年母亦七十餘知府應先烈修郡講院瑛董其役任勞無私人以此重之四代一堂孫在淵有聲於庠年九十卒黃大鳳字棲梧隆慶里人少讀書有會通旣冠目忽盲輒轉醫治略能辨人物父早亡善事母暑爲揮扇寒則以身溫衾母憐其勞數止之不從也母病累年侍左右調護之未嘗諉於妻子嗜病則手承之蓆蓐有遺矢手掬之旣亡凡有事出必告於神主而後行有某兄爲父撫子與居五十年怡怡然如同胞兄偶失檢跪哭而諭之兄爲感動宅前路久圯眾將修之而艱於石大鳳乃食石工於家以致之年餘而途成家故貧蓋省衣食爲之也知縣黃九敘儀其行議請旌無何以病去故未及行年四十餘尙無子後生者凡五歿年有孫十餘

零陵縣志

卷八

人物

孝義

五

蔣鈞字荆來橋頭人早歲食餼貢成均居鄉塾終日惟讀經作詞章不問外事待人和厚無忤篤友愛兄銓固多子凡婚嫁較繁費或有諷鈞析產者曰爲子孫而傷手足雖積財其能久乎且此心固大有弗忍矣迨兄歿諸姪請析產亦在爲之肥瘠多寡不計也惟以不見其兄朝夕悲泣不止年餘而卒子孫皆守其訓多列庠序者

呂純思字久徵束修自愛以濟人爲心疾者施藥丸凍者授絮纊遇鄉鄰爭訟竭力勸慰聞者心折數十年無雀角之鬭前知縣黃九敘嘉其實行欲舉爲鄉飲賓固辭與妻魏氏年俱九十而終其孫宗宜率其行亦九十曾元有聲於庠

張仕貴孝悌鄉人自曾祖孔譽生一達一達生良傑良傑



生仕貴凡四世同居具有家規仕貴謹守之長幼衣食均平如一閭門百口無間言至其曾孫相安於親睦累世惟耕讀爲業從未與人爭訟仕貴卒年九十三永州孝義之家在元有康必榮在明有唐汝賢他日旌義門著國史必張也

何玉芳字靜軒少孤貧治生漸裕居近山瘴鄰里多患疫人各戒避玉芳獨時其饑渴排闥飲食之或煎藥送給卒不染設義渡建涼亭修橋助婚喪前後費數千金八十五歲卒子凌雲庠生慷慨好義倡修澹山巖橋凡兩次計費巨萬而凌雲所需約四千緡次子經運號漫亭與兄同志遇饑寒者時贍給之或貧不能葬則貲棺以殮嘗捐田二十畝爲黼黻嶺文昌宮公費士子至今感之凌雲相傳仙

零陵縣志

卷八

人物

孝義

三

去經運卒年八十一

艾資鎮字靖庵性介直四歲而孤守母訓不妄交母病偕妻左氏晝夜侍衣不解帶居常菽水爲養曲承其歡鄉有爲不善者多正言規之人爲憚服隨力通濟親友堂壁多書先正格言又作戒子詩範家要語以存心積善爲務辟總鎮吏嘉慶初從征黔苗有勞敘八品職未及用而卒年六十八子三長承恩季松齡均廩生次承先字槐卿性孝友資鎮性嚴蹇承順無少違拊季弟至成立子鍾嶽性誠孝如其父道光十二年承先亦以鎮書吏隨軍常甯病亟鍾嶽聞卽欲往省時身復隸籍請假不允久之得以事發遣往至衡州泊八方距駐軍處不遠鍾嶽卽於見父時出舟矚盼無何失足墜水死士人多爲詩紀其事後請旌



入祀孝子祠

胡朝嶧例貢幼時父學泰爲聘張氏女女五歲傷足而跛婦家請辭婚學泰以語朝嶧朝嶧曰女以跛棄將焉歸命也兒安之矣及旣娶跛女或勸置妾則曰吾已有妻矣娶妾何爲聞者義之學泰性方嚴朝嶧每事必稟命而行學泰前妻生朝嶧及朝嶧而卒朝嶧事繼母如所生飲膳必躬省視親戚饋遺必以告暇則率孫曾爲母歡終身不衰六旬居父喪猶毀瘠如不勝弟朝嶧早卒以姪孤愛甚己子待母黨亦曲盡恩誼鄰有貧而鬻妻者亟止之月給以粟凡八年又有鬻子及童媳者爲捐金留之鄉里被災患疫之家及無以卒歲者隨時周卹無所怖人皆以善士稱之朝嶧歿後其子庠生廷傑等皆守其家法

零陵縣志

卷八

人物

孝義

七

周昌庚性孝友兄弟分爨後見兄困乏恆飲助之弟死仍與姪合居均其財產戚族貧者多所周卹平居嘗誦感應果報等書少時客漢上夢神謂曰汝算本促如能存心向善當得八九之年後矢志力行果七十二終子三戒溢庠生孫敏德監生

陳九齡字載張監生宋忠節陳太傅邁十九世孫五歲喪母繼母鄧氏字之極慈九齡亦愛敬篤至父歿鄧年高日必供滑甘夜則醕酒率妻侍食母心怡然又以母好靜居常潛伺戶外聽母警欬辨醒寐夜間母聲輒起至再三不倦如是者三十年遠近稱其至孝鄧氏百歲卒時九齡亦七十矣哀慟如嬰兒三年內有感輒泣與壯時居父喪無異聞者悲之生平好濟人急而德量甚寬見婦人負孺子



墮水身援之出途中爲擔擠落水田亦徐出之不校也年八十餘卒三子俱諸生

劉方珙增生砥行植躬教人先品詣著錄嘗百餘人侍父疾衣不解帶者一月母患脾泄相服或穢污必親浣滌之極寒不以委人祁邑某以積逋鬻其妻方珙爲出金償之俾完聚如前親族貧乏者多周卹之卒年六十第方環恩貢生祖母年九十餘父母及伯叔父母皆年逾七十方環事之皆得其歡心父疾方環適他出心動卽奔歸兩日夜始至嘗習醫理地理謂事親者當並務此鄉有癘疫施以藥多所甦全卒年六十四子心如亦庠生

黃世義字公直父病凡八年世義侍湯藥候聲息晝夜弗離衣不解帶者嘗累月生平好施與矜孤寡助婚葬蠲逋零陵縣志

卷八

人物

孝義

天

焚券無所悕道路橋梁每樂成之年九十卒子二金文繼緒監生孫四人聲遠監生

王朝相字廷弼幼孤事母服勞不懈母疾禱天願以身代平居以禮法律躬言不妄發目不邪視讀書苦質鈍嘗書人一己百語以自勵居深山中怡然自適宗人某請其腴田沃圃卽讓予之族中強豪見朝相輒肅然起敬年七十卒子一孫恩隆入邑庠

胡朝崙字西陵歲貢生少有文譽知府謝仲玩見其文擊節驚嘆內行修飭與物無忤田夫牧豎皆樂與之親鄉鄰詬誶者聞朝崙至卽寂然諸惡少構爭將鬥見之皆慚沮後官辰谿教諭性恬淡任一年卽歸杜門却掃惟教子弟讀書爲娛年七十卒子三映治濟河步雲皆諸生孫曾皆



業儒

雷輝郢字荆山號黃岡貢生祖方旭鄱縣教諭父汝賢蚤逝輝郢事孀母彭氏曲承歡心朔望焚香禱天願減已壽增母算母年八十餘終輝郢學受之叔父永順教諭道衍道衍無嗣立弟輝都爲之後叔母唐氏老病癰輝都夫婦事之至孝輝郢授徒所得率分飲之教姪如子其爲文辭有家法尤精聲韻之學書法亦工所裁成弟子多擅時譽生平好義尙古家近黃溪明月庵明王兆熊死節處輝郢請學政表揚不果行則自爲碑刊於庵右著有荆山集藏於家

周之棫號作人廩生幼食貧苦志力學詩古文有法善真書授徒養親父洵年至九十七乃卒兄之桂性堅復棫謹

零陵縣志

卷八

人物

孝義

五

事之終身無間待人和厚簡默無傲無狎嘉慶間知府薛淇賞其文行延爲子師著有戡士文稿

魏漢昭字倬雲諸生幼孤貧苦至讀書不輟寒暑嗜古文性耿介課徒自給罕至城市事母七十年甘旨供而自茹粗糲母疾藥餌皆親調劑友愛兄弟教人一以正論鄉里重之嘉慶初公舉孝廉固辭之暮年喪子窮厄日甚日眇昏猶時時默誦經史不倦卒年七十九著有雲邨稿

魯希賢監生孝友溫慈力散古處尤樂施與貧乏者輒飲之粟一鄉賴以存活者甚眾憫貧家死喪不能殮預爲構以遺之人咸稱其盛德妻黃氏同心爲善每以匱資助其不給希賢年七十四卒子八孫曾二十餘

高仲顯庠生原名倌以字行家貧授徒養親兄分居不能



佐養又推助之兄歿兩姪貧甚教養如己子歲館家塾訓課以經義爲先高氏子弟十餘人皆其所陶成者先是人習專經至仲顯從其妻父劉烺獨貫通羣經故年少而學有根柢其文章亦卓犖不幸其短命也子懷祺字謙六拔貢仲顯早逝母劉氏守節教成之方仲顯喪時懷祺年十四然泣極哀及長事母盡其力又逮事祖母皆以孝稱其世父二子遠遊久無音耗祖母悲思之懷祺卽以母命歷兩粵如是者三始獲之偕歸又嘗讓產以養兄以此得祖母歡一日聞母疾返自塾夜走百餘里途遇虎不顧亦無患母卒以節上聞請旌次子懷禮字訥齋歲貢生天姿卓犖念母氏苦節乃刻意於學爲榮顯計在塾讀恆徹旦不寐以故爲文獨抒己見不屑效時下華飾教授生徒以零陵縣志

卷八

人物

孝義

三

學行並課與兄懷祺依依如童稚懷祺歿於塾時兩姪尙幼懷禮獨扶柩發喪哀感行旅長沙吳某舊館人也某死其子乞於市爲製衣履並推傭於他肆邑舊無賓興費懷禮倡募置膏腴百餘畝又彙邑中節孝呈請得旌趙逆滋事團結義兵以衛里閭敘勞得六品銜道光元年舉孝友義行入祀孝子祠所著詩古文詞稿多散佚

王好善字珍楚性端厚鄉里推長者每行一善輒自喜曰吾不虛此一日矣子士標孫宗會宗旦宗華俱庠生

劉俊字體乾庠生性仁厚訥訥寡言生平無口過兩江口溪水泛溢往來病涉體乾屢造舟濟年七十二卒子五醮

庠生

謝繩元字達修庠生性耿介言動不苟閉戶讀書不聞外



事父母喪哀毀踰常情聞者傷之及葬鬻產卜地不一委於兄年六十八卒二子俱業儒

王士達字道榮庠生居鄉雍和雖遇童稚未嘗有一欺慢語事父母孝奉養無違顏治喪獨力營措不以累兩弟兩弟家固貧既卒各遺二子俱年幼而士達撫養之同於己出教誨婚配既成立並以其田之肥沃者給之年七十二卒子二景福景祐俱庠生

謝承眷字顧予性敏捷髫年游泮工舉子業裁就後學皆一時選俊居鄉溫霽穆如春風遇爭訟婉言排解之族有饑寒者分館穀資濟償否勿計也年六十一卒

鄧楷字行之慷慨有風義持己待人一本直道言不輕發遇人競訟力釋之年六十卒子四孫十餘咸率其教

零陵縣志

卷八

人物

孝義

三

李廷聯字明所性質樸勤於檢持子孫皆奉行惟謹歲時伏臘子國柱前奉觴婦王氏執肴豆繼之肅然進廷聯侍飲食既訖乃退鄰里美焉同知劉某旌其門曰爲我訓行知縣吳某曰砥行礪俗

劉煊字誠昭號素堂福田鄉人乾隆壬申恩貢候選教諭先世自江西豐城徙家零陵父楨邑庠生母雷氏弟炯烺所煊皆讀書自好炯煊早世餘皆年七八十怡怡一堂至老不倦外祖父雷無後其墓距其家十八里每清明必躬往祭埽之且置田供其歲祀母之族昆弟遇之有加禮族有徙蜀其先墓所在以時修葺之松楸有禁所遺姑姊妹皆待之有恩紀有鄰媪與母厚者老且病時煊亦年與若也或饋食必親至其家俟食畢始返歲時往祀其師歐瑄



墓輒依依不忍歸其篤於親故如是生平寡交游惟與高  
塽周昌德伍之仁孫占鼇韓景元等往來諸君子皆優於  
文行故始終相投合云遊太學時所寓主人贈以琴歸後  
優游林泉時一奏之晏如也性矜嚴遇事義形於色旦晚  
必肅衣冠講禮法出其門者類多修飭之士著有孝經註  
釋卒年八十二弟烺字音昭號石峰幼逮事祖父母卽能  
時其起居初佐耕年十五方就塾爲學刻勵以禮法自持  
雖甚暑不去長服處極勞無惰容倉猝未嘗言色疾遽絕  
口不談人短對穉兒村夫未嘗廢禮貌與人接謙和可挹  
勤於往來而不輕受人饋遺嘗曰取與苟泛大爲身累也  
無賢不肖皆矜式其行烺之徒無貽訾議者其宗鄰無携  
蒲者雖僕從胥知自愛性好遊粵蜀江南山左皆身歷之

零陵縣志

卷八

人物

孝義

三

慷慨樂施與人有緩急以時濟之其父母晚年皆病目皆  
嗜書烺爲誦諷俾聽之以娛其心其門人詩文佳者亦時  
聞於父母熟古詩晨夕時誦之烺卽倚聲而和相與爲樂  
事兄煊如事父旣異居猶時分多潤寡無所吝學精而無  
雜沈酣九經歸於孝經小學至莊騷子史唐宋諸作者無  
不搜覽知府謝仲坑論湖南學者惟烺與孫占鼇爲願望  
云教授莊日正湖北應山人也病革時無一親黨在者預  
舉所蓄千金授烺令存之以待其子蓋信之有素也歷主  
郡邑各書院首崇學而文藝次之程課按日時雖應酬煩  
勞不少曠門下成業發名者幾四百人而烺顧鄉試者十  
六皆不售僅需次廣文以終年七十三歿時爲癸卯八月  
十三日時知縣趙曾齡方與晤言於羣玉書院頃之溘然



而歿門人齊某病將殆忽曰劉五先生騶從何盛也且少待吾卽來其兄曰劉方健何言若是越三日而訃至甯遠張之鈞讀書嶽麓一夕夢與同學者具衣冠迎煇而煇適以是日卒煇凡三遇虎虎皆避去夜大風拔木壓其書室木枝互卧榻而煇無恙鄰居十餘家燬於火至煇宅忽風捲火他向煇之次子方瑚以教習出大興朱文正公珪門故歿而文正爲誌其墓長子方璿丁酉拔貢甲子舉人揀選知縣方瑚己酉拔貢鑲紅旗官學教習 特簡知縣景璿俱郡庠孫昫優增生

張仁桂號月峰小木口人乾隆壬子歲貢年十五以通五經爲夏學使之蓉拔補郡學生凡諸子百家無不瀏覽而詳核之爲文根柢盤深動關世要弱冠父與嫡母相繼卒

零陵縣志

卷八

人物

孝義

三

事生母楊族黨以孝稱諸弟幼孤力督之成 名仕宦相望而仁桂獨數奇不遇以祿養不能致晚年生日嘗謝客蓋痛自涕責云游其門者率敦本 飭行不惟文藝科第也年七十五終子二光煜庠生

高埭字明承號柳村小木口人舉人高榜之孫高燭之子初吳三桂寇黨略永殺燭兩兄且擄燭至雲南彌勒州羈囚者十年一日燭禱神求歸遇異僧示以期且曰汝羈不忘親將有厚福及歸生四子埭其長也其三弟異母出及燭卒三弟幼埭課合讀而獨綜家政毫無所私事繼母張庶母楊皆如所生出入必稟命侍疾不解帶而兩母亦視埭若已出以乾隆甲子舉於鄉時年四十六矣以科第遲



故不及仕進然語門內行則鄉人羣尊仰焉三弟及子彌高孫甯俱庠生

高文元廩生陽東山人幼好學敏於文日可十數藝見者驚爲宿構入庠食餼舉優行昆季六人友愛最篤事父母定省無間父母歿遇生忌日致哀致敬嗚咽爲孺子泣沒之日沐浴具衣冠詣家廟拜奠旣訖端坐而逝

劉繼寬字宏德優廩生性孝友凡供給父母一切皆竭身運致不諉於貧父疾夜禱北辰求以身代父喪已六七年遇生死忌日猶歔歔嗚咽一木假山父素所珍翫者對之輒愴悼且作長歌以寫哀痛母壽而健寬日相依如孺子遇有所欣愛之物必陳於母與兩弟友愛終身知縣冀方唱高其行贈母以銀幣寬爲詩謝之人多傳誦寬自爲諸零陵縣志

卷八

人物

孝義

三

生科歲試輒冠曹於詩策尤長云

黃瀚字匯安庠生禮塘人母氏沈妻唐沈病而唐亦病力疾侍沈湯藥及沈愈而唐劇將歿瀚曰汝爲吾母直以身代吾誓不再娶以酬汝及唐卒瀚時年二十六父母兄弟勸之娶不應又屬星士以其子不壽恐之須娶乃有繼生者竟不爲動後其子以文章名旣入庠將請於當道以彰其行瀚曰如是是借汝母以爲名矣堅不允瀚祖父皆好善兄弟五人皆務施濟遇人急傾囊助之歲製百靈膏並小兒丸以濟疾者瀚初入塾卽刻二語於木簡云欲爲天下不可少之人當做世間所難能之事蓋其志趣固如此卒年六十六弟淮字濟川事親至孝盛暑必取水以潤其所居季弟病走數百里爲之祠禱至省城市參耆之佳者



淮精於醫有求治者不計遠近往應之既痊不受醮遇貧者並施藥餌有貧困而嫁其妻者已成約且受金矣淮聞爲如數償之而全其夫婦妻弟卒遺孤二歲爲撫之成人淮初未有子至五十九先後生二子人以其爲積善之報張仁樂邑增生字融齋北鄉小木口人性孝友父癱瘓時嘗投徒於外每課經藝皆口授仁樂書之日扶掖上下床夜則抱其足而卧澣滌械牖皆親之伯兄歿家貧撫教其姪如己出其學先倫紀而後詞章歷試輒高等遠近從游掇科第以百十計子四光曾光輔鄉舉光懷光環庠生嘗暑月諸子進小瓶酒角豆一盂慨然曰人家幾絕食我何福猶飲也其質性誠厚如此光曾字省齋淫於書子史經傳能記某卷某葉隨所指不爽善屬文累數千言援筆立

零陵縣志

卷八

人物

孝義

三

就性節儉非養親不市甘旨乾隆甲寅捷於鄉由大挑授教諭歷任茶陵衡山所在得士心著有一餘齋文集行世光輔字可坊似癡家塾去宅數百武往返嘗不識路徑然讀書輒目數行下及長遂通貫淵博入庠後友教鄉閭從游多名下士性落拓不事家人生產兄勸之則曰彼贏金何如一經之所用不盡也領嘉慶乙卯鄉舉四試禮部不第以大挑授武陵訓導陞新化教諭比歸囊無餘錢惟圖書數卷年五十八卒有漱潤窗遺草行世孫明詠光懷子字紫瀾幼聰穎涉獵經史一目十行十三爲文有奇氣尤工駢體弱冠入郡庠屢考居上等中湘陳漢卿以國士目之鄉試凡十一越三薦未售性孝友年二十六卽喪妻或勸之續曰牀第之情深卽定省之儀疎不欲以彼易此也



教兩弟程課嚴而意和異兄弟自相師友兩弟學業皆其所陶成者年三十六歿著作多毀於兵燹僅存紫瀾遺草律賦行世孫明誥光輔子字子宜少孤貧將輟讀爲買販以人多輕侮復業讀日夜苦攻久之文名噪甚弱冠入學道光己酉登拔萃咸豐辛亥舉於鄉性脫略與人無恩怨事母至孝力供甘旨嘗就鄰借斗米則以八升易一雞供母膳母患腹瀉值夜或牀蓆污穢不可寢而時復嚴寒則以己所寢者易母而身與妻抱子女坐以達旦人皆以爲難主講羣玉書院從游多賢達者課子不尙嚴切能使學業日進五試春官不第以教習授知縣尋請假養親年五十三卒著詩文集待梓其律賦附紫瀾遺草行世

以下新編

零陵縣志

卷八 人物

孝義

三

販零陵遂家焉性篤孝後聽鹿客游山西洪洞瓊徒步往返數千里凡兩次始迎而歸家富於貲而性喜賙卹人微之族姻至者如歸返則有驢就居則爲置業因瓊而厚獲者不可數計遇貧乏尤有恩紀每歲暮給丐者度臘資遠近合千餘人人各數百錢行之終身不勑嘉慶間年饑所積米數百石悉減價出糶親友有不給者饋遺之邑有陳某者食指凡數百幾不舉火爲遺米十石濟之有告貸者不少吝其償否聽焉然竟以此罄其家意夷然不悔也妻孫氏內助有賢名壽俱八十四卒子若春從九孫二長瑞齡邑庠

朱一孟字賢生福田鄉馬鞍嶺人家富以儉自持而施與則不少吝乾隆間大饑穀米騰貴一孟出所積倍減值以



羅貧民賁者留餐全活甚眾辛樂洞鄧某販木貸其金數百折閱歸罄產猶不能償欲嫁其妻聞之急返其券止之鄰何某多所稱貸償以牛羸甚既而失所在逾數年牛忽將其二子歸遠近稱異之年踰六十無故不茹葷非大雪不衣棉內外事皆親爲之子紹文邑庠生一孟性剛直事之無幾微忤兄弟五友愛無間言長兄早逝遺姪僅半歲撫之成立排解紛難不畏強禦鄉里憚之從季弟登任請捐馬鞍嶺田二十八畝資羣玉書院膏火士子賴焉孫國鉅字萬超事親先意承志篤友愛析產時田舍多寡勿較借貸或不能償者卽焚其券嘗捐八萬錢助建三聖宮爲士子講習之所城東茆江橋傾圯倡捐田畝以資歲修性耿介一日暮出路中拾一囊舉之沈重不啟視待其人而零陵縣志

卷八

人物

孝義

七

還之其人問姓名不告而退卒年七十八子二孫三成業成采俱邑庠

周大祿字伯廉北鄉奉義里人六歲失恃同母第一繼母第三父母性亢嚴偶有怒爲跪而泣請之務期愉悅兄弟意趣亦殊或相尤爲詳言曲諭致親愛乃已由乾隆迄咸豐更四朝家近百口然後析箸孝友之譽溢於里門有同姓諸生某中年殂謝婦離子且幼家貧如洗大祿則約同志者輪旋而撫養之課讀畢婚及生子而某子又故復撫其子爲婚娶之如前子沛霖郡庠孫善述邑庠人咸以爲積善之報云

蔣之香字廷桂高溪司人少失怙事母色養備至妻或拂母意必痛責之性友愛昆季四白首同居怡怡式好初服



賈既贏錢悉以進兄及兄歿析居則多予姪產相傳香賈漢鎮時拾遺金訪其人還之漢固狹斜地然未嘗一游及之妻喪不娶鰥居數十年卒年九十餘子一孫三曾孫十餘人

蔣斐若邑庠性和平好善單江溧溪諸石橋皆所倡修里中爭端悉力排解或出貲不悛也喜善書凡先輩格言皆手錄積帙盈筭以遺後輩嘗曰以田地遺子孫不如以善言遺子孫爲可久也

唐德秀字毓川府學生少英敏爲文多古致尤長詩賦以疾輟讀業醫著醫方袖珍傳世用藥所投輒效嘗診人脈凡病在數年後者能預斷之既醫不計酬貧苦者且貲以藥餌喜善書會刊航中帆勸世

零陵縣志

卷八

人物

孝義

三

蔣摺升字敘笏監生生而穎異善屬文名輩多賞識之事親孝父歿家政率然不改其舊母病日延名醫診治湯藥皆親進如是者數年母歿哀痛泣號感動閭里與伯叔兄弟處終身無纖芥嫌好施與鄰族匱乏稱貸不吝不償則焚其券歲歉凡遠鄉行旅工匠至家必留食而資遣之橋梁道路多所修造或凌侮之含容不校蓋人所難能者子恆字月如太學生常赴省試適邑人陳敬恭病痢危甚同人畏傳染多避徙他所恆時與陳異寓既初試出聞其病卽往視藥餌不更入場越七日陳卒爲棺殮之護以歸雖妨試事不憾也卒年七十五孫逢潤字海潮孝事父母家頗饒既中落則授徒以養嘗館於外每出必依戀嗚咽歸亦如之年二十肄業綠天庵讀論語至父母唯其疾之憂



章適家人傳其父母語問近狀遂感泣作詩紀之懇款深  
愛情見乎詞會孫秉圭邑庠

蕭旦臣字明旭少躬耕養父母中年以服賈裕生計喜施  
與貧者周之秀良者資其學嘉慶乙亥鄉鄰患疫旦臣沿  
門問視餽以藥物人以爲難橋梁道路殫力修治行路間  
見人塘堰有罅漏輒爲苴塞之其隨地濟人多類此年九  
十三無疾卒子步雲號敦甫邑庠生事親極色養母晚年  
患痰夜咳不寐步雲侍卧起衣不解帶者數年母逝時旦  
臣年八十一矣雲陰飲泣而對父則愉色以慰其心及旦  
歿雲擗踊號泣聲動鄰里越明年以哀毀卒步雲子宜之  
事母亦孝母病禱於神願以身代有子德溥爲母所鍾愛  
及德溥客死異鄉宜之與妻周陰悲悼之不以聞於母步

零陵縣志

卷八

人物

孝義

三

雲歿時諸弟尚稚爲撫誨成立弟病請某醫不應則跣求  
之而親煎藥以飲歲暮嘗袖金以給貧者道光甲午饑出  
藏粟贍鄰里不濟則謀諸妻典簪珥以助明年復然里中  
子弟質美而不能讀者多方培就之少爲王媚川周祚勳  
所器重心甚感焉後祚勳遇難聞之力疾奔救及歸道卒  
黎士首少孤性勤敏能候時轉物營業賈以贍家事母曲  
盡誠禮強幹能任事締修府城隍廟數年始畢功皆獨力  
爲之費用不餘卽以贖貧乏卒日集諸遺負併出其券焚  
之眾爲感泣子承煜幼警敏博學通經史然阨於遇久之  
遂自放於酒家以此日貧晚年乃授徒自給有四子課之  
甚嚴次得盛三得亮尤以才略通顯於世

李二酉西鄉黃泥橋人性孝友兄某奉父徙甯遠時二酉



年十三卽隨侍與兄怡怡無間言父常患癱一二酉時方賈乃輟業以奉藥膳如是凡五載與人交坦易無城府然遇不違亦直言無所徇一鄉引以爲重數十年無爭訟者卒年九十三

唐一禹字爾湯北鄉山橋頭人性寬厚爲縣吏遇爭構多勸息之所居里無訟獄者殆四十餘年家頗饒輕財仗義或借貸不能償則焚其券族中賴以舉火者二十餘家至捐修橋路尤數行之迄老不倦

顏有庭字廷用高溪司北安里人少貧服賈養親愛敬備至堂兄有華客淮北二十餘載有庭往尋之偕歸且請父爲華娶妻而分給產業焉胞兄有榮早世撫諸姪有恩紀長姪占魁樂施濟與庭同志鄰某偪於債欲嫁其妻魁捐零陵縣志

卷八

人物

孝義

罕

贊保全之凡賑賑族戚助修橋路皆慷慨爲之不勸有庭年八十五卒子三宗典邑庠

黃元龍南鄉橫江山人家貧事母孝年五十餘每夜寒必身溫被俟母寢方寢子世利有至性逮事祖母祖母病齧手指血書疏禱於神請減己算以增祖母指爲枯瘠父子純孝相繼出自寒賤殆天性使然歟

蔣龍緇郡庠生幼貧甚晝負薪夜則讀書年三十始入庠越年乃娶婦修檢清厲日以功過錄自課性至孝母病癰寢輿扶掖凡二十餘年父母繼歿悼思不已號泣時取淚研墨自繪雙親圖懸於堂壁日奉侍如生圖有題句哀韻激徹動人心脾至今傳誦之壽八十有一卒

高悅頤貢生北鄉小木口人體貌魁梧博學工詞翰天性



篤孝方肄業書院。家甚遠，聞母病，卽夜歸，獨行無所畏。阻母晚年患瘋疾，時悅頤已年老矣。一切飲食盥櫛皆身侍之，不委於妻子。其孝思蓋老而逾篤云。

周昌後貢生，居仁里，人好施，予歲終常製絮衣數百以濟寒者，或貧不能葬，爲棺以殮。又聞漢陽敦本堂備諸義行，心慕之，命其子毓英往襄其事。凡捐金五百兩，毓英庠生，性仁厚，及父歿，綜家政，尤慷慨好義。有父風，遇歲歉，計里中窮苦者，按口賦食，姻戚不自存者，悉贍養之。嘗捐田壹百六畝，零於濂溪書院爲祭祀膏火之資。

蔣元，河南鄉人，性友愛，事兄若父。兄遠出，及期不歸，則延望無停趾。及見，則涕泣夜必聯床寢。兄患病，湯藥必親侍，衣不解帶者凡三閱月。兄卒，號慟死，而復甦者再。子二長。

零陵縣志

卷八 人物

孝義

單

生春附貢生

劉宗敏，天姿警慧，年方幼，經史百家靡不通洽。以試赴郡，路遇日者，謂曰：君命蹇薄，無兼全者。此試如得名，後卽難得子矣。宗敏曰：科名身外物也。不孝有三，無後爲大。乃不試歸。後生子，年八十而終。

蔣作球，南鄉承平洞人。父方沛，患痿痺，時母已先歿。球獨力服侍，常從父寢，不入內室。父又患瘡疥，癢甚，球每夜爬搔俟寢，醋乃止，瘡潰血流，溢並時遺矢溺。球爲數澣滌，不嫌穢污，家極貧，然每食必供珍膳。如是者十餘年。先是，方沛嘗從祁陽郭某學，郭患足疾，日嘗卧不能運動，血涔涔污床褥。時方夏，方沛爲洗滌，朝夕進藥膳，累月不懈。及作球侍疾，復如此。人以爲敬師之報云。



胡承坤北鄉梅溪洲人積學未售援例入貢父蚤世事母  
夏最孝敬每晨衣冠問安數十年不倦事叔父如父析居  
後日分供午餐甘旨必備尤喜刊善書勸人以此負重債  
鬻產乃償族遠祖坟墓隕毀者出貲修葺親鄰年高者每  
歲存問饋送不絕年七十餘卒子五光儀光顯國子生光  
斗邑庠

唐三倫號敦圃北鄉蔡家甸人家貧業漁性至孝父某買  
四川久不歸倫往求之比至無音跡腰囊罄盡乃求爲人  
牧主者感其孝止之厚贖以行一日住郵舍聞有鄉音來  
者疑爲父詢之果然相持大哭遂迎歸奉養以終子黃裳  
以拔貢歷任福建侯官仙游綏城等縣三倫嘗往侯官布  
衣草履若爲旅行者潛訪其子官蹟然後至署居數日而  
零陵縣志

卷八

人物

孝義

望

返卒年八十

謝士蔚號霞軒慶源里羊角井人性孝友母疾危親爲嘗  
糞冬夜溫被十餘年如一日事兄奐如如父析產田園屋  
舍推多取少咸豐己未督學胡瑞瀾以篤行可風榜其廬  
睦本陞慶源里大木塘人父久病嘗遺矢溺汚床褥陞每  
爲洗滌夜則隨寢無間寒暑凡十餘年父歿旣免喪久或  
道及之猶涕淚不自勝云年八十二卒

唐三泮號鳳藻北鄉人三歲失怙事母孝溫清無曠職母  
歿號泣動閭里遇堂兄弟如同胞生平輕貲財好行義舉  
冬施棉夏施茶津梁道路倡修不懈尤精岐黃延視必符  
子二長珮瑤邑庠

周士琦號培園縣學生事孀母至孝歲授徒於家一夜更



盡聞有大呼士琦名者啟戶無所見駭甚返內適母以驅鼠升樓墜地氣幾絕士琦急掖起泣且禱乃甦人以為孝感所致母年九十餘請旌士琦徵諸名流詩表暴其節為刊傳之卒年八十四

鄧伯義福田鄉人移居甯遠清水橋妻唐氏汲水得遺金以語伯義待其人而還之其人分半以謝固卻不受子三富樂行善事凡橋梁道路多所捐修遇人有忿爭力為排解鄉里有善人之目富年八十七卒孫炳南歲貢曾孫喜霖邑庠

高佳字毓秀生平多義舉竭力延師課三子讀子懋柏字翠庵入邑庠性脫略工文掌教嶽麓羅典雅重之有翠庵遺稿行世

零陵縣志

卷八

人物

孝義

三

高儼字人望邑庠陽東山人性方直敦本篤行女夫湯炳冕死於粵時女年十八勛以守節及其翁姑歿女無依乃迎歸終其身卒受旌焉

黃學秀邑庠生有膽略道光十二年趙金龍滋事人心惶亂時秀從甯遠歸具狀於縣力破妖議以解惑從者奉縣檄偵探賊情秀圖陳要害兼征勦方略上於臺督撫喜甚即令募勇屯馬鞍嶺堵勦之一方安堵集有五經經解三十六卷待梓

周法濂字蓮池冷水灘人生而俊穎博通經史就試見諸生所為時文心厭之遂棄制舉業以詩畫自娛間為古文亦有可傳頌者性孤介不妄取與好面論人過失甚則怒詈故有遺行者皆曰毋令周君知也容儀修敕對人終日



端坐不勸盛暑不袒上衣嘗謂男女居室天下至褻故終身不娶寡交游不喜諧當道力貧自守嘗卽詩見志著有寒蟹吟集藏於家卒年七十八

胡忠高字伯可蔡家埠人少孤外祖欲奪母志忠高哀慘銜之遂終身絕通問家貧藉買醵養親幼頗讀書暇嘗手通鑑閱之能心識其義生平動法古人無少過失性至孝以父早亡甚哀感不茹葷酒而奉母甘旨無缺母疾百計營療痊可乃已比卒泣如孺子見者慟然族弟忠富父早歿見虐於後母忠高為請於母而收養之不信因果而一切有利於人者罔不傾資以助至今猶傳頌弗衰云子希瑗以舉人授廣西知縣

熊時龍高溪人性敦厚服賈養親慷慨好施舍親友貧乏零陵縣志 卷八 人物 孝義 器

孤寡者周恤之甚力每歲暮時袖金行里中遇不能卒歲者予之且戒勿言嘉慶乙丑歲既熟願於佃耕者各減其租之半使買以贍來歲恐或不給也教子甚嚴隆重師長子世鵬號南峯邑庠性篤孝時龍歿廬於墓左終身不去其庭樹常有鳥來巢咸謂孝感所致事母悅愉承順妻氏趙偶違其意亟欲出之誓悔乃已兄世範係異姓入繼者視若同胞兄艱於嗣為置妾既生子即歿又撫姪至成立初時龍於高溪置義渡歲久漸廢弛世鵬復倡捐增上下埠及紅牌樓三處渡船且置田廬為久遠計歲癸卯火鄰舍延燒殆盡世鵬居獨無恙人謂為善之報云

蔣自強家貧事母孝每負薪入城易魚肉供母母病篤為嘗糞以卜差否少與兄同寢其被水棉所裝及娶謂其妻



曰汝被綿較溫曷以易兄水棉彼獨寢必怯寒也妻喜從之卒年七十八子乘陽郡廩生

唐時昇號珠圍例貢生家饒裕而務施予或求貸無弗應者道光間歲饑民不得食時昇爲減價糶所藏穀盡復力請縣令開常平倉濟之全活甚眾十二年搖逆滋事時城中兵力單弱當事懼甚時昇爲出貲募勇助守禦民以安堵事平大吏旌其門局量寬和有村農某面呼其名若弗聞者子四長名遠縣丞次璟附貢孫八錫齡由附貢捐貴州經歷補鎮遠知縣加花翎知府銜

呂善元號靜齋秉姿英異由歲貢選教職以親老不赴弟二仲膺廢疾待之數十年如一日季客死招其子歸教養幾至成立不幸又卒性婞潔不苟取與教人先器識而後零陵縣志

卷八

人物 孝義

五

文藝主講羣玉書院十一年受業者皆華實並懋同治丁卯以恩賜登賢書子載渭廩生早逝孫四躬自撫立卒年九十七

梁靜庵字志仁曲阿人性忼爽識大義鄰里有爭端剖以一言皆俯服遇人急難重金以解有童某應督學試先期手數百金屬爲黃緣靜庵受之給曰汝第剝心文藝毋再問也某忻然入場文成甚速且佳及榜發果雋翌日來謁反其金笑曰伊汝文之力我何能爲也某感愧請以半謝嚴却之道光辛卯搖變出貲募勇命長子綬祖率之助守戰事平以功給六品銜綬祖旋加捐知縣補授直隸容城子二次晉國學卒年九十

鄧永康字壽山邑城人幼積學無所售而敦厲善行不勌



嘗刊印文昌孝經每延師課子弟卽屬以是書並爲講說又嘗施膏藥患毒者敷之卽愈每煎製時必致齋三日蓋盡其誠潔也敬惜字紙見街巷有棄置者必檢歸每場試畢卽爲檢拾歸滌以清水俟乾而焚之壽八十三子秉清歲貢生咸豐九年以軍功保訓導

屈國智字仁山邑城人性倣儻敢任事咸豐九年粵逆石達開黨圍城援兵至自西河不得渡國智率人肩門扇編橋逆之是日戰勝殺賊無算事後論功堅不受諸大帥益器偉之

陳壽田居北關外從九銜好義舉橋梁廟宇多倡爲之咸豐九年粵逆攻城壽田簡團練備器械爲堵禦計備極勤勩圍解予六品銜子嘉賓邑庠生

零陵縣志

卷八

人物

孝義

哭

劉試采字素源性剛直嗜學工詞翰以縣試第一入庠鄉試凡十九屢薦不售精四子書講義多發前人所未發館東邑三十年多所陶就時俗試入學者每重貲酬其師試采家固窘然未嘗責酬於諸生曰此道義相與也壽八十二終子璜工書以經古入庠

梁謙泰字吉來邑城人第昌中早逝子二長八歲次方襁褓弟婦白氏守拊之家殊窘賴謙泰時給贍之妻氏陳亦賢慧凡有賙恤必先白曰爲悴苦尤甚也及白以節獲旌皆謙泰力爲之子養源郡廩生

朱世卓號溪山福田鄉馬鞍嶺人年二十六喪妻子甫六歲躬自撫養時弟婦並歿乃爲弟再授室或勸世卓娶曰有弟婦主中饋一子承宗嗣足矣奚娶爲卒年七十餘



盧東曉字旭齋例貢生事母蔣極孝家貧豐裕樂爲善其師高鵝山老而貧賙之終其身鄰居節婦某冬苦寒爲棉衣贈之有家貧子幼力不給將鬻其妻者東曉爲募錢穀周給之夫妻以是得全澹山建石橋嘗捐三百餘金以資其費子禹疇孫應駒庠生

鄧名利字見若例貢生上辛里人少以勤儉起家性伉爽樂善津梁道路多所增修建亭施茶並置田爲經久計鄰里貧病者藥之死則棺瘞之終歲製絮衣以衣寒人生平所費不下數千金而家道日起蓋爲善之報子二長德裕字綽然例貢生性孝友好善有父風所需或不時給則舉債濟之道光壬辰趙金龍叛德裕時募勇堵白水嶺賊不能進繼隨官軍躡勦賊平以功賜六品銜嘗刻文昌孝經

零陵縣志

卷八

人物

孝義

三

家寶全集行世次德涵字靜軒例貢生性剛直遇事敢言不避嫌怨喜施予能世其德德裕長子正階字星平優廩生援例授攸縣訓導課士先行誼而後文詞游其門者多端士咸豐初以假歸時粵逆犯境郡城戒嚴知府黃文琛屢辦軍需正階殫力營厝軍無饑潰越二載復任以母老致仕歸家居一年卒先一日晨猶力疾至母榻前問安否歿時則向母而泣無一言及子孫者其孝行純篤如此子學城貢生學珍庚午副貢

黃裕璋邑城人父姓蔡以出繼遂冒今姓叔某貧無賴璋日奉錢百文米二升稍拂卽怒詈璋曰汝非黃氏子也吾將逐汝璋悉容忿之而所奉不爲間有幹略喜排解邑人唐時昇購某田數畝除夕某忽裸身塗泥入時昇家勢洶



洵將不測璋往引歸給錢米遣之子四崇壽入邑庠  
周友進字拙修性孝友母晚患痿痺百計莫愈友進沐浴  
焚香籲天再命久之母忽曰予病固不起上帝感汝誠得  
弛期至秋涼矣卒葬青山橋距家二十餘里每至墓輒悲  
戀不忍歸友進有三弟友鵬友昆既少失怙其二弟皆所  
拊成者友昆嘗得心疾友進爲遍求醫學或憫其勞則曰  
弟在一日卽母心安一日也友鵬長子官幼聰慧友進愛  
如己子而督課之綦勤官領庚午鄉薦皆友進力云壽九  
十子三季禮郡庠生

郭紹清西鄉火燒橋人事親曲承意旨年六十餘時比冬  
寒猶爲父溫被其純孝如此年九十卒子鳴鳳郡庠生

王在鎬字振西馬尾山人幼失怙事母以孝稱遠祖墓多  
零陵縣志

卷八

人物

孝義

哭

蕪沒爲搜訪之各樹以表更捐資祭掃爲經久計歲暮給  
貧人錢穀不能葬者助以棺所在橋路多所倡修卒年九  
十二子恩隆字綬堂嘗逮事祖母祖母疾泣禱於天請減  
己算益之一夜夢神曰爾孤非可短年數者然鑒汝誠且  
增爾祖母壽三於是祖母病起更三年乃卒恩隆年十九  
入郡庠屢列優等友教五十年藉以成名者指不勝屈子  
四長齡季丞俱庠生

周景龍業鎔金有遠商寄銀三百兩更他往道死後其子  
至不知也景龍取以還之封識宛然爲人寬厚犯而不校  
年八十二終子天針孫開鼎監生開第庠生皆有家風  
魏大受字克承躬自節嗇而濟人惟恐不及歲歉率家人  
食粥曰人饑我忍獨飽邪旣秋穀登隨出糶立盡大受祖



父皆諸生故教弟子甚殷禮敬師長久而不怠其舊師之貧者猶延致於家養之雖士夫無以過也年八十七卒子彌新監生彌捷庠生孫四人俱業儒

蔣濂字厚山號拙軒事母孝謹至老不衰母多疾終身不外出口授經課士暇卽歸省主講濂溪書院二十年成就甚多如蔣雲寬熊光大先後以甲科顯生平堅確自守慎默寡言教人務勵名節待弟姪有恩紀妻歿不再娶見重守令然絕無請託先由歲貢就教職嘉慶元年徵孝廉方正賜六品秩大吏以學殖行修旌其廬濂少時隨父外游渡江墜水瀕死者再皆以救免後迄六十六歲而卒鄉人以爲忠信所致自濂卒講院曠弛士多思之著有心竹軒詩集式古編等書

零陵縣志

卷八

人物

孝義

完

孫宗茂號調元進賢鄉人性忠厚以孝友聞好周濟貧乏鄉鄰待以舉火者數百戶無恆產者資以貿易里中由是少游民某歲大旱米貴出穀三百石貸鄉人不取息及秋多不能償者竟置不問大廟頭河梁三渡壞於水輸貲修復之更置田爲經久計祁邑木客負金六百病卒憫其貧取券焚之並厚恤其家有爲竊者婉誨之使改行而諱其前事不以語人崇敬師儒里中劉大年館於家修禮無怠同學生貧不支者助以膏火大年家固貧以選貢北上率宗茂資其行大年旅京十餘年其家常仰給焉比大年歸且歿厚賻之且爲封墓歲時率子弟致祭終身無缺禮卒年七十一喪日哭者數百人子二克繩郡庠克配國學孫十一長昌後同治壬戌鄉舉時年已五十矣相傳先一年



除夕昌後夢其師大年與勞苦若平生曰明秋汝必領鄉薦其文當主誠字醒而記之屆期入試其首題爲其事上也敬二句昌後從其言果捷羣以爲隆師之報

胡國漢唐爾朝楚江墟人兩人家相若也有善行卽並力爲之始終不間以故鄉間義舉多二人倡者廣西寶慶兩大道自嘉慶間傾圮無修葺者行旅困乏二人於是走數百里庀材程工或不足則募於眾歷年餘而兩道成今其子孫多在庠好善者咸舉以爲勸

胡漢昭號載颺縣學生北鄉梅溪洲人爲人重本原事父母孝待師長誠敬少從張仁樂遊事之如父仁樂歿值生忌日輒沐浴焚香禮敬如生前好排解紛難館祁陽時有因錢故構訟者歷十餘載不決昭暗出館金數十以釋之

零陵縣志

卷八

人物

孝義

辛

當事俱不知錢自何來也年六十餘夜夢輿馬僕從云迎作某縣土神醒以告家人誌之越數日無疾而卒子搢貢生孫紹宏廩生曾孫達南郡廩生

楊廷才字佐卿北鄉存樸里人慷慨有大志少孤貧撫諸弟成立長兄用四弟煥俱蚤世無嗣爲立後且分以產好善樂施所在橋梁道路皆其倡修黑狗灘建置義渡力任其事又立古塚碑數十性公直里有爭端一言立剖物望咸推之疾革時以存天理作好人囑其子孫他無所言也卒年七十餘子二長榮森邑庠出繼堂弟次茂源保舉教諭加五品銜孫七志倬廩生

李向榮字石樹福田里大深塘人慷慨好施里中貧不能葬者貲以棺殮欲嫁妻者爲保全之至修葺橋梁道路建



茶亭其事多爲人所傳誦子二三槐三松國學生孫五世芳世德邑庠生

諸肇豐州同銜馬鞍嶺人事母孝母病瘵三年晨夕上下牀皆躬侍之湯藥必親進不假奴婢友愛異母弟終身無間嘉慶間年饑出所積穀減價糶貧民全活甚眾捐對達坪田十八畝助邑人士賓興之費佃民某素無賴故逋租以爲鮮豐置不校後某亦感悟請償其租豐曰汝能如是是區區者不汝責也卒年七十八

胡制宜字度齋北鄉梅溪洲人例貢性忠厚鄉鄰有爭角力爲調停好周恤貧乏每歲五六月間宗親不能舉火者量爲假貸甚者施予之貸不能償則焚其券

蔣澹字叔質邑庠生食貧守道不干涉外事同居有爲人

零陵縣志

卷八

人物

孝義

至

營解而私獲金者或挪揄之澹但默不言也嘗適外甥王某其妻請以饋遺澹曰人貽甥以苞苴吾貽甥以詩文吾所贈多矣其清概如此

王仕吉字謙益花橋人少失怙家貧母再醮仕吉隨之然事母謹母疾經年醫藥皆躬奉之久而憊及夜則慮其睡酣母或呼之不覺也時方夏乃袒身卧帳外藉蚊以警之尤精於醫道光乙未里大疫歷比戶診之全活甚多乞丐遠人亦獲濟焉

黃一梁北鄉明塘人篤於孝友母患瘋疾服侍湯藥衣不解帶者幾兩寒暑同堂弟某少失怙恃撫育成入爲之娶妻且置產焉道光乙未一梁客滇省之幕南爲佃礦金也幕南屬蠻徼時同行二千餘人推梁爲長適蠻與漢幾構



大覺梁請往和眾危之梁曰不和則二千餘人休矣豈得獨存遂往盡歷危險始達蠻府爲百端開諭並餌以金蠻乃感動敦好如初後歸與同伴分金有碎金百餘遺梁篋眾不知也併出分之其不欺如此子蔭槐庠生

龍玉均字秉衡冷水市人性孝友父卒米漿不入口者三日哀悼動里閭家頗饒族中貧乏者悉賙濟之地方義舉多爲所倡成

王金鼎字汝梅候選理閭冷水市人里中所稱孝子者也爲人端厚一言行必執於禮事父母左右扶持未嘗一日離慶弔往返經宿者卽不赴父年九十七有隱疾苦臙穢爲日夜滌濯不一諉家人年餘始愈後復病目嘗訪名醫數百里外多方營治及盲凡行動取攜悉順承如所欲使

零陵縣志

卷八

人物

孝義

五

父若未盲者母高氏年八十八久病氣血枯耗中結或四五日始一矢時急不能下或潤以蜜汁用指甲徐出之夜卧於側不解衣聞衾幃微動卽起視有痰則手承之晝則坐牀前以此是不履市井者十餘年平生多義舉如建祠廟橋梁親董其事而未嘗食於公鄉黨稱貸不吝不迫償有積券悉燔之同治初舉孝廉方正堅辭之年七十後猶能於燈下觀蠅頭字書丹顏長髯如神仙中人壽九十二無疾卒時五子俱年七十內外孫曾百餘葬時號泣闔閭觀者嘆羨里中私謚爲孝正先生

蔣作傑字漢三以家貧業賈其肆距家八里許因母病癱每日暮必歸省爲整理衣衾率晨具飲食畢始返肆雖雨雪無間凡十餘年母故殯喪猫仔嶺嘗獨往宿護然無室



廬夜深有虎卧於側以爲犬也叱之不去及晨起視其跡知爲虎亦不甚恐次夜仍倚喪宿年九十一卒

盧學治字民安兄弟凡三幼業讀繼棄去治生產性固通敏諧植溉又勤苦等傭作田苗繁碩不數年家大起及仲兄濟時補諸生心喜之復治舊業一年亦入庠旣以家事付伯兄子史垣則語婦子曰史垣方直我尤憚服之汝輩當無違忤也於是家人肅然幼聘卜氏無何卜以疾形痾然而寢家人請辭婚不聽卒娶之生子一  
奉友乾性至孝父病劇爲文禱於神願減算一紀以延父後病果愈逾十二年乃終

劉勳廩生幼積學有至性母病疫躬侍湯藥不以委妻子及歿哭之哀淚盡繼以血復爲病染未幾卒

零陵縣志

卷八

人物

孝義

三

曹永禡號濟川少讀書有大志里黨稱之道光十二年錦田汛猺逆滋事投某帥麾下以平寇敘勞得軍功八品留掌左營守科文移錦田汛係兩廣要隘猺出歿無常兵寡而食且絀卒難防禦禡建議增兵四百並援鎮算成例每丁加折銀貳兩獲允行兵民感而私祀之至今不絕禡兄弟四長永富從征鎮算陣亡祀昭忠祠永祿永祥壽各八十一俱稱爲長者禡年七十八卒子二長世興縣學生以咸豐九年防堵府城論功授訓導賞戴藍翎次世鎮邑庠生  
李術隆慶里人性最孝父本材老年喜游覽然艱步履再術躬以籃輿舁之以博其歡子如模亦有孝行如模子尙熾復然如模存日從不外宿與戚里讌會雖數十里必



歸有過失被笞不怨

李順景辛興里人居鄉賢寺側母病痿二十餘年事之無倦

眭正鎖字玉成號方圭孝悌鄉人少勤學經史外無所嗜好然屢試不能補諸生人多惜之事母黃氏至孝母患風手足不仁爲日夜扶掖未嘗離如此凡四年友愛兩弟爲之授室妻喪不復娶時年甫二十也

楊發達字維明隆慶里人幼喪父事母熊氏五十餘年不離左右母歿哀悼幾至毀滅鄉鄰感歎

庾寅谷花橋人三歲失恃爲繼母所撫性篤孝事繼母能得其歡父性嚴一日侍從郊游父問一事猝未及答卽手杖逐撻之至跪請移時乃已父年八十餘患臂癱經月膿零陵縣志

卷八

人物 孝義

黃

潰寅谷常爲舐吮久之竟以此不起寅谷哀禮盡致葬後設位於寢朝夕問視供食若生平如是者三年  
庾作書花橋人事父母孝敬無違一日有白鳥入室未幾而作書歿人以爲孝感所致初業儒以數奇改習醫尤精眼科貧賈者遺以藥全愈甚眾歲入稍贏輒以濟寒悴孤獨者然往往託於他人不自名也友人貧且死則存恤其子女初以此家業幾盡而行之不倦後子以儉積貲廓於舊人謂好善之報

黃正信孝悌鄉馬橋人性孝友嘉慶二十四年父兄以坵塋事斃族之强者時正信年十八方讀塾中間之歸告父兄請代未允卽潛詣縣自承令某上其事於臺嘉其孝友獄具從輕遣發道光元年以赦歸爲人謹厚善居積歸後



數年成巨富焉

鄧丹山東鄉人事親無言色過母患痰每啗輒以手承之凡二十餘年鄉里稱其孝

盧學淑縣學生承平洞人性誠孝年十餘喪母至以頭觸棺號痛幾不欲生比長言及輒泣下善事父家極貧每食必供時鮮物父患痰疾或卧而啗則以掌承受之父歿哀痛如喪母時繼母劉患目疾禱神延醫尤爲周至嘗授徒以劉故弗外館遠方聘者俱卻之終身未嘗離側劉卒時淑年已六十矣猶哀泣如孺子聞者惻然道光十五年旌表入祀孝子祠

楊靈字青園北鄉存樸里人邑庠生性謙謹好施予精岐黃術有延診者必往貧困者助以藥貲尤好吟咏著有青零陵縣志

卷八

人物

孝義

五

園詩草待梓卒年七十八

奉正昌黃陽司人生平戒殺買物放生歲行之不倦治家有規法子姪或失行卽長跪自訟請改而後已卒之日躬自沐浴召家人咸集曰吾數終矣隱几而逝壽七十六魯廷舉例貢性孝友父歿弟幼獨兼家政終身無私財分產推多取少局量寬達遇橫逆受之不報卒年七十五子五三仕達多善行鄰人王佳勇廖元玉累於債欲嫁妻以償爲出貲保全之遂爲夫婦如初

劉華峯縣學生福田里水車頭人性耿介家貧授徒自給其教以修倫篤行爲重有盤澡德劉開來者家極貧從學八九年未受一錢以爲贄也後兩人館於外稍有饋遺力卻之但勉以無負人子弟而已及老益窘乃織屨以資食



用不肯乞貸於人卒年七十七

余興孔字爾昭小河江人性諒直不苟言笑喜與學者談忠孝大節家頗裕自奉極約而修橋葺道出貲無少愆卒日有族人遇諸途問曰將適皮揚漕庵及其人歸詢之已歿半日矣年八十三

蔣程九號漢槎邑庠生高溪大方洲人性篤厚幼貧甚種瓜賣之得錢必市肉供母父販鹺既入庠仍繼其業往返江淮不數年獲巨貲曾從鄧雲亭學鄧老而貧周恤備至鄧歿殮瘞皆任其費相知有稱貸不受券蓋陰遺之也卒年七十六

周道政孝悌鄉雲龍村人性端嚴重禮教嘗延名師課子姪朔望必盛服拜之飲饌潔豐而囑師程功最嚴季考月零陵縣志

卷八

人物

孝義

美

試做書院規製前列者予優獎里中子弟多受其益事父母兄嫂惟謹鄉里以孝友稱之子五炳文庠生孫八顯親庠生

伍鍾嶽字靜齋歲貢大井頭人事親曲承色笑父晚年患心疾扶侍湯藥寒暑無少懈與弟鍾惠自幼至老驩悵不衰視諸姪猶子講學授徒置別業任里中子弟從游不計修俸與鄉鄰決是非不徇人皆欽服之黼黻嶺文昌宮畧江口義渡皆其所倡建者子象賢庠生孫桂生廩生

鄧明志字淡軒樂郊里人嘗居城設酤市去家數十里每得時果新蔬必奉父母不先嘗也族嫗中貧不能葬者爲之棺殮塚某負某金若干責之亟畀以產盡鬻而償之子二長興松有傳在忠義次興桂議敘九品



周昌前字光裕號厚亭太學生父早喪家貧力作以養母撫弟妹皆成立婚嫁以時母歿哀悼幾至滅毀有舅某及其子皆蚤歿其姑媳孀居時存撫之姨母缺養迎於家奉侍終身置義庄以贍族貧者子五

唐聖垣號春山庠生幼出嗣伯父事之孝而事生父母亦孝謹生母晚年患咳扶持湯藥積歲無間邑育嬰義渡諸事多所倡行貧不能葬者助之棺殮爲老埠頭渡口增置田數十畝以經久遠人尤賴之子四曉春庠生

蔣光斗武庠生性傲儻所交皆當代名流尤好善舉郡城及文廟忠孝祠俱所倡修兄弟五友愛備至遇爭端力爲排解鄉里倚任之

蕭燦臣高溪人以服賈爲業嘗遠出二子一姪從之一日攜以渡某江舟且覆燦臣獨力救姪置二子不顧或怪問之曰吾弟止此子苟可全吾卽爲鄧伯道不悔也已而二子俱爲榜人拯出得不死

王章輝東鄉福田洞人少貧負販以養親甘毳無缺兄章炳先徙永明旣死遺子甫三歲章輝返之爲撫成人年二十餘喪妻終身不復娶

鄧興大字展成樂郊里人父病咳經年躬侍湯藥不懈初父艱於嗣時撫族某爲子及興大長待之不啻同懷姑適某貧不自給爲置田數十畝以供贍之姑死復營紀其喪又爲姑子娶婦

周宗弼字贊臣有弟性蹇傲時以非禮相遇弼能隱忍之愛好如故及析爨猶時爲經綜其家以弟素疎縱不務生



產也孫祚聰庠生

艾本一字連城父蚤世事母至孝遇親友必以勸善書相勉導鄉有爭端爲直言剖決眾悚服焉子文炳庠生

黃理字士修水市橋人幼出繼伯父某伯父家故貧生父家故裕然未嘗有怨悔也食貧自力服賈以養久之家漸起性剛直族黨咸敬憚之子二孫九長孫麟炳郡庠生

胡海清字鏡溪例貢南鄉人幼積學未售家富於貲而衣食儉穀自視如寒士至遇諸義舉則輸助不少吝敬禮文學延師課子弟館穀必極豐厚子廣源庠生事親孝謹父病危侍湯藥衣不解帶者累月母沒時季弟甫歲餘撫之成立友愛純至事繼母能得歡心道光己酉大饑減價糶穀鄉里多蒙其惠妻唐氏亦知大義繼母病癱唐氏極力零陵縣志

卷八

人物

孝義

五

調護澣澣之役皆躬親之廣源歿五子皆稚唐氏嚴慈並用卒以有成

蔣萬選號青渠太學生烏鴉山人性慷慨橋梁道路多所倡修貧不能婚葬者周恤之遇爭忿極力排解一鄉因無獄訟壽八十三子道裕庠生孫昌俎舉孝廉方正

魏見三字鑑塘太學生進賢鄉高賢材人兄弟四父早喪乃獨輟讀綜家政而令諸弟力學性誠厚好善舉橋梁道路多所倡修歲荒減價出藏穀以賑貧困鄉鄰有爭財致訟者居間出貲以解其事姪懷芳甫週晬失怙恃爲撫教之懷芳舉辛酉拔貢

曾盛周毛坪人早孤有至性家貧傭工爲生每月必兩歸省母並市肉遺之凡蔬菜初出約母未食不先食也兄某



以事入粵久無耗往尋之遇路歧輒合草履如擲筭狀哭  
泣求神示久之卒尋歸兄歿嫂再嫁遺子及養媳僅數茂  
力撫之成立姪復生子母歿哀痛幾至毀滅而喪葬如禮  
無何室燬於火盛周竟以窮悴卒

胡煜字文彬性孝友兄弟三父鍾愛其長兄意欲多予產  
析居煜卽曲承父意推多取少後更以勤儉起家與兄埒  
好義舉凡道路津梁多所修葺族有不給者周之有以貧  
將嫁其婦者助貲完全之今其後約千餘人

楊時炫字耀南西鄉隆慶里人明御史萬材七世孫也性  
篤孝父鍾愛之兄弟三炫最少同居六十餘年無間言析  
產時推多取少嘗出貲營解里中事由是里中少爭訟者  
尤喜義舉倡修橋路助婚嫁救溺女人多稱頌

零陵縣志

卷八

人物

孝義

堯

唐昌運字介庭幼失怙事母馮得其歡心母疾恃湯藥不  
少離夜潛起撫視枕衾不令母知也事兩兄嫂父命之坐  
始坐一庭之內怡怡如也性好善次子仙齡捐千金與邑  
人士重修永善堂承昌運志也子與齡戊午鄉舉孫希璜  
郡庠生

韓炳周字式南懋德子高亢有父風讀書嫻詞章然不應  
試工書所書屏聯人爭寶貴之好義舉立放生堂惜字紙  
刊傳經文捐修道路皆實力舉行之

蔣永魁字靜軒邑城人以勤儉起家一日悉推所置田畝  
予兄弟而永魁獨更經創之久之復裕力善喜施雖多費  
不惜姪輩務生計而艱於貲本者助之勿令償也子名世  
廩生



李炳字蔚軒邑城人庠生性直確爲文宗先正授徒三十年所從游多騰達者性好善府縣學宮考棚及各廟宇皆所倡修筦文昌宮計簿數年約增產業二千餘金咸豐己未石逆圍縣城炳綜局事衣不解帶者凡七晝夜事平保藍翎六品訓導子玉德候補州同章德庠生庸德六品銜候補縣丞懋德國學生

周方正楚江墟人道光乙未歲旱田苗幾稿時傭工者少方正重貲集十餘人車水灌之將集事而族中强者要眾去子姪請與爭固阻之越日而天大雨强者悔憾焉凡負債不能償者悉呼而反其券

蔣養民東鄉橋頭人年二十五妻喪遺子三歲躬鞠之守義不娶

零陵縣志

卷八

人物 孝義

卒

睦本根西鄉名山嶺人年二十九喪妻子女二俱幼穉躬自撫教終身不更娶

唐天祐楚江墟人幼孤隨母育於唐有文家有文故豐於貲生子某而有文歿天祐既長卽筦攝家政後其子漸游蕩天祐屢規不從卽以計簿筦鑰付之而身歸本宗貲財無一毫私後天祐更以勤儉起家性介直遇不平事常裁抑之不避嫌怨尤喜剗修祠廟卒年六十餘

祝友煥字建南性厚多義舉少與周進士圭友善圭性豪縱未第時數貸於友煥未嘗質券及圭由進士作吏歸仍償友煥曰此長者不可負也一日檢地理書得秘本多壞人墳墓術亟焚之乾隆末安南貢象過境至孟公山有寡婦子爲象傷鄉人羣趨毆象於是貢使怒止不行者三



日官府輸以金猶未去適友煇至爲友人書聯貢使一見賞之邀與筆談因責以陪臣大義使甚敬之乃卻金出境而並贈友煇安桂焉旣而郡城水癘作疫人多病者友煇家十餘人獨以餌桂得免人謂忠厚之報妻伍氏亦賢淑子五季仙齡郡庠生性孝友父歿析產仙齡獨奉母居城內養生送死皆竭力爲之不分任諸兄也祖田十餘畝爲兄某竊賣知其窘置不問先後爲府縣幕客三十餘年未嘗干以私至地方利病則切直言之出亦不以告人有兄弟訟者仙齡爲反覆諭以至性其兄弟皆泣下復相和好年七十五卒子四長長治郡庠生保舉訓導加五品銜向陞颺字賡階邑庠生性至孝父蚤歿事嫡母生母胥得歡心母喪哭踊踰禮忌日常哀泣如新喪至老不衰鄉試零陵縣志

卷八

人物

孝義

空

凡十二蓋自爲諸生每試必赴屢不第亦不怨也相傳每入試錄所爲文必取晉人某帖置其前字字而倣之故試嘗過時以不完卷被黜人有給者輒信其言旣知之亦夷然弗怒也居近縣署然非公不至主講義塾二十餘年咸豐乙卯以守城功保訓導李榮增泉塘冲人性仁厚好施予道光乙未歲饑出所藏不足又貸呂姓錢穀若干以濟貧者孫二俱庠生唐成章邑庠生性誠孝父病歲恆數月成章與弟德培更相侍無間寒暑父病篤成章禱以身代並誓力行諸善以延父壽德培後以母病冒雨往祈神遘寒疾卒成章以痛弟致疾相繼卒成章子善繼郡庠生張承烈號文軒邑優增生性質直知醫嘗設藥肆以濟貧



病者以是家漸落然不悔也咸豐己未石逆犯境當事屬以團練承烈部署有法並陳團練十要知府楊翰行其言屢效素患咯血一發數斗然未嘗令母知也適母疾承烈強扶持之凡數月母歿以哀毀卒著有古文古近體詩周紹邠字遷安進賢鄉人明南戶部尙書希聖八世孫也家貧力學嘗從伯父澄世讀日伍農作夜就塾自課久之學大進以縣試第一入學歷歲試復第一食餼家居授徒爲文主理法屏浮藻遠近多就質之裁成甚眾每發一題必擬作一二藝或已就寢有所得卽起篝燈書之旣成乃已其精苦如此生有幹略邑自道光來科第多不達或以學宮痺陋不得地爲言紹邠卽倡邑人徙而新之規製廓於前由是登第者漸眾己酉歲饑邑令胡廷槐出倉穀糶零陵縣志

卷八

人物

孝義

李

貧者而屬紹邠綜其事眾聞之競來糶勢甚謹擾紹邠措處有方越一日夜而穀畢糶無濫且遺者咸豐九年石達開圍城時紹邠已先在城知府楊翰要與共守是時乘城兵才數百不足則雜以市人勢危甚紹邠助郡守日巡眾激以忠義凡七日夜不休會援兵至大破賊城下圍解先是紹邠子崇佑崇傳聞賊方圍城卽夜奔至縋城入請紹邠歸不可曰吾已許楊公矣二子乃留與守圍解始偕出事後以歲貢加訓導自軍興以來國帑空匱民率輸家貲助饗紹邠嘗與邑紳分治其事或有侵漁者卽斥之無所徇有不便於民多方幹正之故事集而民不擾晚年尤耽精詩文著撰有程課著有古農文鈔駢體文詠史詩雜詩若干卷卒年七十二子崇佑廩生崇傳翰林院編修崇備



庠生

陳志邦監生父瑞生老多病凡藥餌必手煎以進與弟志實同居無間設家塾待師有加禮貧家子弟皆招入課讀飲其膏火方鳩工築父瑩夜半聞哭聲甚哀訪之則工楊某鬻其妻時與訣也志邦卽爲償身值全其伉儷嘗至黃葉渡見墜水者急呼曰能拯者與十五金於是漁人人掖而出得不死志邦卽如其數予之子四長鉅華監生次寶孫汝琛俱庠生

李瑞瓊隆慶里人甫周歲喪母就乳族嫂後嫂瞽且絕瓊每晨夕必往執役十餘年不倦嫂故哀如喪母其父繼娶生三子瓊事繼母能得歡心待弟尤推多取少卒年近八十

零陵縣志

卷八

人物

孝義

奎

唐才盛字鳳卿北鄉人事親孝父病革時年已八十餘矣盛焚香禱於神願減己算以增父父歿晝夕感泣孺慕不衰好善樂施鄉間義舉多所資助壽七十餘無疾卒

魯有巍字雲峯性溫厚少孤事母至孝豐於財屢被欺凌終身無怨言設塾延師館穀隆盛供膳獨任之寒畷並資以膏火如是者數十年多所造就今猶傳頌其禮意云卒年七十八子三孫曾蕃衍

譚顯承幼承伯父祧伯父與父皆早故惟兩母尙存顯承兼事之孝養備至同母弟析產時均分之並竭力助諸姪婚嫁卒年七十六子三孫十三曾孫四

黃祥麟北鄉明塘人性耿介好善喜施道光十五年歲歉貧濟貧困全活甚多修港子口義渡並置田以充其實今



利賴之子三孫曾繁衍壽七十餘卒

高懷鵬恩貢生北鄉人邑庠生遠揚子生而穎異善屬文尤工駢體性篤孝遠揚病幾不起鵬祠禱願以身代既而病愈逾年乃卒赴秋闈屢薦不遇授徒於外門下多知名士子鏡瑜璣鑑俱庠生

胡國獻郵亭墟人以力田起家好行善事本境石橋年久爲水圯國獻募資重修功未竟卒長子三鐸成其事獨捐貲二百餘緡蔣某負三鐸錢數十緡償以田蔣母老不能辦棺槨哀三鐸減收三鐸還其券壽八十二次子三悅邑庠生名作相事兄謹終身無失禮性和易鄉黨有爭訟力爲排解見人困乏輒周之咸豐己未流民過境量地遠近給之多所全活卒年六十四

零陵縣志

卷八

人物

孝義

畜

胡正紀字肇修冷水市人性仁厚父早歿奉母甚謹侍從兄如同胞道光十六年市火正紀家蕩然惟市肆獨存其肆蓋與姪共者於是悉歸姪姪甚感焉後正紀更起家而姪貧猶分給之母王氏年八十六歿正紀已七十有三矣居喪哀悼里人爲感動

王金和字子咸候選縣丞冷水溪人父蚤故事祖父母母至孝少博學工文章屢試不第父歿遂廢讀理家政延師課子禮數優崇負幹略悉心世務每遇團練軍需諸巨舉皆一身肩之吏胥無所擾鄉黨咸受其福

呂道崧號嶽岡優增生岐山人博學洽聞精制藝尤工詩古文歷鄉試不第遂絕意進取性簡默不苟言笑而魁岸多行義凡宗祠義田義塾家乘皆其所綜成者道光乙未



歲饑糶米施粥全活貧餒者甚眾

陳思美花橋雜路口人以詩書釐訓鄉黨生平無詞色過有貧將嫁其妻者爲出資保完之尤敬惜字紙歲時拾檢不懈年七十二卒前數日自言某夕有人背黃包袱云某日時迎我爲某土神及期果歿

羅世瑞東鄉下辛里人仕廉繼子也少穎悟學力過人方入繼時仕廉已蚤卒事母氏龍甚得其歡而事生母亦無缺禮生母歿父續娶陳性亢烈瑞尤委心順承不逢其怒陳亦甚鍾愛不啻所生鄉有爭角竭力營解息而後已橋梁道路多所倡成

周天美東鄉菱角塘人兄弟凡三天美少出桃叔父某旣分爨卽徙居與兄天善相距五里許兄病疫聞之卽趨省零陵縣志

卷八

人物

孝義

奎

其妻懼其傳染沮之不可遂往爲兄奉湯藥兄病革卽身抱而寢越三晝夜不舍及兄終美歸亦逝時年二十九妻黃氏撫二孤依外氏居焉

呂道潔字蓮清邑城人生平勤儉治家有法初居鄉後徙城中每返舊居一族爲之愛敬相款如賓卒年八十八卒時取積券數十紙焚之而手陰隲書不釋子冠南字文峰郡庠生善事母母病不改其歡將死謂南曰我死汝勿哀汝之事我殆無餘憾也性慷慨輕財仗義道光十二年趙金龍叛江華捐貲募勇隨堵剿有功總督納奏給六品銜十五年旱饑力賑之傾所藏猶不濟乃貸錢數百千以足之全活甚眾有寡婦賣田於豪族某而已以遺糧受累欲嫁其媳以償冠南爲白於官歸其糧於某而保全其媳



又胡氏亦以貧將嫁媳復保全之如前嘗典衣得錢五千以三千助人葬緣是幾罄其產咸豐元年與籌餉有富人請賄免力卻之卒年八十一曾孫兆熊登同治丁卯鄉榜羅鴻緒字溶川派名正源東鄉白鷺廟人性儼不羣淹通書籍工詩賦屢試諸生不得年三十卒人多惜之生平敦檢操嘗讀書古剎有少艾窺窗誂之拒不納事後作詩一章以自警咸豐九年弟某死於賊哭之慟並作歌弔之其歌效杜同谷體繁韻促節悽愴動人緒爲叔父所撫叔歿哀禮兼至孀某氏亦愛如已出旣歿孀憂思成疾不數年亦卒子二妻某氏撫之今成立

許高美西鄉許家橋人家貧事親至孝日肩輿以備值供羞膳主者或食以肉則懷歸以遺親終年不外宿人問之零陵縣志

卷八

人物

孝義

矣

曰有親須侍寢也親歿哀痛深至自後不復肩輿矣

黃三拱孝悌鄉石角塘人本姓蔣出嗣黃超玉遂冒其姓超玉性嚴卞稍不如意卽怒甚則鞭笞三拱率順受之無怨年四十餘猶然家極貧力耕以養甘珍不缺父歿哀毀幾至滅性終身不娶撫子五連亦以孝稱拱有疾爲輟飲食跪禱於竈神及愈乃己人以爲三拱孝行之報

楊五仕孝悌鄉石角塘人事母孝母性褊急曲承無所忤母病痰入秋卽怯寒五仕夜則溫被晨起先服母衣治爨俟母興更易之母樂餌甘羞竭力營供不給則借貸如是者二十餘年妻喪不娶爲弟授室有姪二以次嗣之

顏邦光高溪司人父蚤歿母湯氏兄弟凡三家貧甚或從湯再醮時光尙幼爲痛哭挽留之無何兄弟俱天光獨身



供母竭力營措久之不支乃奉母如漢泉賣水果以給而  
母食必供肉既復奉母歸無家則乞食鄉里有肉輒留之  
遺母夜寒無爐火以身溫被侍母寢母年七十六終哀毀  
成疾閱一年卒年五十二凡侍母近四十年未嘗一日離  
左右

蔣昌楚孝悌鄉鹿鳴塘人事父至孝曲意承志以博其歡  
冬寒以身溫被父未及寐侍牀側弗退如是凡數十年父  
歿奉木主每出必告反亦如之

李守權西鄉東湘橋西塘村人父母蚤世事祖母以孝聞  
咸豐九年粵賊至其祖母老艱於行乃負之出避賊匪追  
及守權謂賊曰與殺祖母寧殺我也賊竟殺之而舍其祖  
母聞者哀悼之

零陵縣志

卷八

人物

孝義

七

徐方灝東湘橋人性至孝母病危爲之嘗糞又有程榮運  
者居荷葉塘家被火榮運身出入烈燄中以救母母免於  
難

張正左字作丞城南承平洞人讀書能文而淡於名利敦  
篤孝友母患目嗜猪肝每食必進無或缺季弟有疾醫藥  
時不給嘗稱貸以供其費病愈乃已正左後亦精岐黃術  
全活甚眾卒年七十三

胡學濂字紹周邑庠生事親至孝謹尤好周給貧乏某歲  
饑輸粟於族鄰多所全活歸陽石橋圯捐金以襄其事賀  
某家貧將鬻其妻爲募貲保全之卒年九十子孫多顯達  
者孫廷桓字公玉太學生性好善每歲購水絮竹笠若干  
給貧者橋梁道路多所修葺篤友愛析產後或有不給時



眷眷惠顧之卒年八十三

孫逢古城東花山嶺人性友愛家貧好學能詩咸豐二年  
應營道縣雲溪塾聘三月歸赴院試入學事畢其叔弟  
負行李偕至館及第歸適粵賊踞營道途路梗塞吉日夜  
憂悸賦憶弟詩一章久之成疾明年卒先是吉方赴館時  
賊已偏近營道矣其弟固勸毋行曰不可不終人事也及  
第歸所經路多賊出歿其存亡無息耗故吉憂悸甚既知  
弟實歸而疾已不可爲矣憶弟詩詞旨哀傷讀之泣下  
熊之遜東鄉人性友愛咸豐九年石達開賊黨圍郡城兄  
之通死焉遜哀痛甚訪大營號哭乞師時賊營白鷺廟及  
師至仙神橋未見賊眾欲兵之遜曰再前如不見請就死  
又數里抵白鷺廟出賊不意大敗之餘黨竄去當事上其  
零陵縣志

卷八

人物

孝義

奕

功給六品銜

劉宏仙北鄉翟家洞人咸豐九年粵賊入境父獻廷老且  
病不能走匿宏仙卽侍父於家聞賊將至各藏於室奧處  
無何賊獲獻廷將加刃宏仙遽出請曰與殺父不如殺我  
賊竟舍獻廷而殺宏仙

顏其新高溪司例貢步瀛仲子也端品勵學先達率器偉  
之年二十未娶母周氏嘗澣於池一日忽失足墜水時其  
新方讀塾中間之卽奔往躍入池昇母隨出死者數池最  
深以力盡同斃及里人至出其屍猶手挽母手也今池涸  
僉曰孝感所致

黃九祥大木口人事母孝咸豐己未粵逆竄境祥侍母於  
家爲賊刺創左足久之愈奉母以終



唐中矩東鄉孟塘人事親孝竭力樵薪以供甘旨咸豐九年石逆竄境父某艱於行負而逃賊踵至殺之而父以老得釋

朱聲遠郡庠生馬鞍嶺人性篤孝母早世事繼母能得其歡出繼叔某母氏唐孀居事之無幾微忤時生父尚存以年老夜不能寐聲遠每侍唐寢後卽往從讌談以消長夜唐旣請旌出貲建專坊舅家貧時供給之歲時無缺咸豐九年石逆攻郡城各鄉皆其黨所出歿聲遠奉母避陶家灣山谷中一夜賊炬火牢搜至相距且咫尺而母又艱於徙避聲遠命其子遠去爲宗祧計而獨與妻盤氏奉母誓俱斃俄而火滅賊亦退論者謂孝行所感云生平尙行義舉里人呂鼎佳以事坐誣爲昭雪之歲饑貸穀賙貧人零陵縣志

卷八

人物

孝義

完

不取其息母歿以哀毀致疾卒

秦禮仁水北鄉高溪司人性至孝父三旭遠賈儀徵咸豐三年粵逆陷金陵爲所掠憤鬱而死禮仁聞卽奔走數千里冒鋒鏑入金陵尋其遺骸盛以箱舁而出賊疑箱有貨財見輒窘迫卒奔而免其歸喪葬如禮時咸豐十年事也盛永貴北鄉黃陽司人幼嗜書以父多病廢讀侍左右凡六載未嘗少離湯藥必親進年三十喪妻不再娶待弟尤友愛同居終身無間性寬能容物里惡少以非禮犯之置不與校惡少感其誠卒愧謝焉卒年八十八

盛丙南黃陽司人性孝謹父母早世哀毀逾禮觀者感泣每值生忌日拜奠淚泔泔下如新喪者教子不令有私儲曰兄弟參商多以此也家七十餘人雍雍緝諧至今守其



教性好施道光咸豐間歲薦饑減價出糶全活甚多喜誘  
拔後進族中學多有成者

楊榜槐隆慶里人事親無幾微忤饒膳不假妻孥冬爲溫  
被親老患渴寒夜必三四起溫茶以進壽九十三子開茂  
晚生事兩繼母極謹好義舉貧難婚葬者助之壽八十一  
茂子宏昭字濟南佃戶某欲鬻妻以償逋負昭代完之咸  
豐九年帶勇守城洵至同知

楊友棟性友愛析居時推多取少自奉儉嗇以有餘濟貧  
乏子孫今二百餘人

蔣榮亨隆慶里人事繼母至孝供膳必親調爲祈壽多修  
橋路養孤獨每清明遠近無祀之墓代祭掃壽八十一子  
昌榮善承父志形魁梧性洒落多吟咏喜接士類咸豐九  
零陵縣志

卷八

人物

孝義

卅

年以團練功加五品銜孫習之翰林待詔

黃心錦號紫垣少孤事母能得其歡母病劇每夜潛禱於  
天願減已算以延母值父母生忌日必詣墓泣奠終身不  
改子四順溥順潭均庠生

楊文烈字丕顯隆慶里人性倜儻積學未售父病侍湯藥  
衣不解帶者累月及廬墓三年母性嚴多方以致歡娛篤  
友愛美田宅讓之負債者焚其券

唐雲朗號玉山例貢性和平不與人較是非與弟雲青四  
代同居內外無間言外祖母余楊氏老無依迎養二十餘  
年敬禮不倦沒爲營葬同治壬戌丙寅歲荒穀米昂貴減  
價出糶全活甚多

陶國瑞成賢子歷任白象嶺東把總性純孝父有所欲必



委曲力致之或怒則長跪請罪務得歡心知醫每製丸散以拯疾苦多所全活督諸弟成立子命胄歲貢遇春外委陣亡事見忠義

孝丐者魏姓逸其名幼以病兩足屈齧嘗反手踞地仰而行有母叔母並盲皆倚以養處深山中而丐日日乞於外山當樵採要徑日得升米或不能卽歸則因樵者以遺母與叔母偶多則以米易肉遺之月必歸省訊安否以爲常一日行某嶺上嶺路故斗絕時天方雨忽迅雷破空起駭而顛身如轉石去嶺上數十武及警而起則足能屈伸若未始病者試行則不孑如恆人矣見者以爲誠孝荷天祐競厚賜之日所得倍於常積久遂爲母叔母治喪具衣棺敕備未幾母叔母相繼逝丐亦尋卒有好事者斲石肖其像零陵縣志

卷八

人物

孝義

七

置某洞中至今見者猶競稱孝丐云

唐宗密字文理福田鄉人性孝友父母早世時三弟皆幼密撫成之初業儒繼以會計入公門遇爭訟多所勸釋妻胡氏亦以勤儉相夫家道遂隆隆起與弟同居五十年不聞詬誶聲子三孫九

唐炳相福田洞人父大純早世竭力奉母母病癱相親侍湯藥數年無懈妻歿終身不娶

唐熊吉字丹崖邑庠生北鄉蔡家埠人事孀母至孝以舌耕養甘旨未嘗缺咸豐己未石逆圍永吉館進賢鄉聞警恐母受驚星夜奔馳至沙平渡江流甚湍舟離岸丈餘躍不及仆水中舟子以篙出之人咸詫爲神助母疾設榻其側衣不解帶湯藥必親調尤好義舉本境文昌宮湖洞路



屢傾屢修募真不及變產以濟子一長慎修登賢書次敬修入邑庠

蔣昌俎字惺子邑庠生南鄉烏鴟山人最孝謹母性嚴能得其歡心母病夜侍床褥衣不解帶母令就寢退立門外勿使母知聞轉側聲即入問候有女第二母鍾愛之錢谷什物聽其取攜不禁也與人和易鄉有爭端望其至即為冰釋建樂善堂飢施食寒施衣病施藥倡修橋路不懈其最著者瀧泊毘連營道路極仄且低春夏漲溢刺船以濟灘危水險難免覆溺昌俎募重金益出已貫鑿路山腰行人稱便咸豐紀元詔舉特科羣以昌俎應卒年五十三

蔣顯臣號惺齋郡廩生性質直靜謚言行一無苟士林重之尤孝友教兩弟讀不尙嚴苛均令學成同治庚午季弟零陵縣志

卷八

人物

孝義

三

不祿顯臣悲痛既至然又恐父母知外鎮抑而內實裂毀逾年患癩瘋勸者每一啟口即潸潸淚下父晚病足召醫檢方無弗至卒哀極所患益劇先修邑志籍襄筆纂歲大旱邑侯策賑復力任其事明年光緒紀元以制科交薦固辭尋遭母喪未葬卒